

耶穌聖心聖月

北京什庫天主堂遺使會印書館印

天主降生後一千九百四十四年印

耶穌聖心聖月

北京主教滿准

## 耶穌聖心聖月序

教中信友。我今告知爾等。一無窮無盡之寶藏。從其中。可得救靈升天之各般聖寵。無不現成容易。此寶藏非他。即耶穌基利斯督之聖心也。今將此聖心明示於爾等之前。俾爾等欽崇愛慕之。默思效法之。耶穌天主也。無所不能。亦真人也。極愛我輩。爲愛我等降世成人。具有靈魂肉身。同有我等之心情。其在世也。甘爲貧賤之人。受憂苦。受凌辱。受鞭打。茨冠。被釘十字架上死。以贖我等之罪。而其聖心之愛情。猶以爲未足。又給我等。留一極愛之憑據。立聖體聖事。以養我等之靈魂。隱藏於麪酒形內。晝夜與我等相偕。然而在此聖事之內。每日又受罪人之忽畧冷淡。冒領冒食。輕侮作踐之凌辱。豈不更傷其聖心哉。我等宜趨赴此被刺被辱之聖心臺前。欽崇之。愛慕之。以我等之叩拜讚揚。賠補其所受之辱。奉

獻我輩之心。以慰其憂苦。雖我等之心。滿被罪惡之贓污。盡是罪惡之傷痕。仍獻於彼。求爲洗去其污瘵。治其傷。只要我等勿再頑梗。不聽耶穌之訓。定志痛改前非。向之哀懇曰。吾主憐憫我禍患之靈魂。則慈善耶穌。必然俯聽也。我等更以熱切心情。每日虔行默想。以善過此聖月。每日獻我等之靈魂。求主降福祝聖。不拘行何本分之際。謹記默想中。所定善志。時以虔切熱愛之短誦。舉心向主。凡此諸端。又皆偕同聖母瑪利亞至聖至潔之心。以行之。求聖母引導我等之心情。歸向耶穌。獻我等之事。功於耶穌。因聖母聖心之愛慕耶穌。悅樂耶穌。總超一切神聖之愛慕悅樂。我等賴其轉達相通之力。庶可樂耶穌之心也。願望耶穌聖心。徧受光榮讚頌。至於無窮世焉。

天主降生後一千八百八十七年聖母獻耶穌於主堂瞻禮日

主教達方濟各題

耶穌聖心聖月目錄

奉獻於耶穌聖心誦

見一張

論敬禮耶穌聖心聖月之來歷

見三張

獻已於耶穌聖心誦

見五張

第一日論熱心敬愛耶穌聖心之來由

見六張

第二日論耶穌所許恭敬聖心者極厚之恩寵

見十一張

第三論敬禮聖心之首效即是愛主

見十四張

第四日論敬禮耶穌聖心之着落終向及與恭敬聖體之異同

見十八張

第五日論耶穌聖心之尊貴奧妙

見二十二張

第六日仍論耶穌聖心之尊貴奧妙

見二十五張

第七日仍論耶穌聖心之尊貴奧妙

見二十九張

第八日論耶穌聖心愛人之切

見三十二張

第九日論耶穌聖心極願結合於人心

見三十六張

第十日論耶穌聖心之富

見四十一張

第十一日論耶穌聖心之痛苦

見四十五張

第十二日論耶穌聖心之傷

見四十八張

第十三日論耶穌聖心切望之事

見五十二張

第十四日論耶穌聖心所求於人者何事

見五十六張

第十五日論耶穌聖心廣招衆人

見六十張

第十六日論如何入居耶穌聖心之內

見六十三張

第十七日論人靈不拘處何境遇耶穌聖心恒乃良方

見六十七張

第十八日論耶穌聖心在山園憂悶至死

見六十九張

第十九日仍耶穌聖心山園憂苦

見七十三張

第二十日論熱愛聖心者俱樂部想耶穌苦難

見七十六張

第二十一日論人心之薄情

見八十張

第二十二日論耶穌聖心之怨嘆

見八十三張

第二十三日論恭敬聖心宜行之工

見八十七張

第二十四日論諸聖人之熱愛耶穌聖心

見九十張

第二十五日論耶穌聖心像

見九十三張

第二十六日論何者阻人不得恭敬聖心之大益

見七十二張

第二十七日論克苦以除恭敬聖心之阻

見一百張

第二十八日論欲得敬愛耶穌聖心之熱心第一法是善求

見百零四張

第二十九日論欲得敬愛聖心之熱心第二法是勤領聖體

見百零七張

第三十日論欲得敬愛聖心熱心第三法是朝拜聖體

見百一十張

第三十一日論欲得敬愛耶穌聖心第四法是熱心恭敬

聖母無玷聖心

見百一十四張

第三十二日論欲得熱切敬愛耶穌聖心第五法是熱切恭敬

大聖若瑟聖史若望與聖類思公撒各

見百一十七張

第三十三日論耶穌聖心極願人熱切傳播敬愛聖心之善工


見百二十張

耶穌聖心聖月目錄

終

奉獻於耶穌聖心誦

吁。耶穌至聖之心。爲救我衆。在十字架上。被鐵槍刺者。矜憐我等。今逢大慶之辰。敬同聖教會。並因聖會之名。獻心於爾。求主收納。永爲爾物。至慈耶穌。勿記我等辜恩負德。輕忽怠慢之罪。今特以此奉獻。補償爾每日。從我罪人所受之辱。更爲補償爾。在聖體聖事中所受之辱。至可欽崇之聖心。我等今以虔誠熱切之情。將此本處教會。主教鐸德。信友各家。全心奉獻於爾。求賜降福。普施恩佑。使同愛爾。謹守爾誠。吁。至甘至飴。耶穌聖心。求爾記憶。自生民以來。未聞有奔爾臺前。求爾憐憫。而被棄絕者。我等罪人。懷此倚靠之心。趨赴爾仁慈臺前。歎息號泣。俯伏於爾足下。懇祈救世恩主。勿拒我求。俯聽允諾。 亞孟。



至聖耶穌之母。童貞瑪利亞之聖心。爾亦我等慈悲之母。求爾慨發仁慈。轉達於爾聖子耶穌。納我所獻。因爾功德。賴爾保護。賜得同升天國。偕爾永享榮福。亞孟。

## 耶穌聖心聖月

### 論敬禮耶穌聖心聖月之來歷

耶穌聖心聖月之興。自開創至今。年代猶未甚遠。按一位熱心學士所說。是從一學房內之幼女而起。此女極愛聖母。百計千方。求樂聖母之心。以圖得入聖母兒女會。一日幼女之師。勸其格外恭敬耶穌聖心。以求此恩。幼女即云。我今日領聖體後謝恩時。偶來一念。自問曰。既有聖母聖月。何故不行耶穌聖心聖月乎。聞此幼女之言。闔院莫不樂從。時乃天主降生後一千八百三十四年。洋五月也。適巴黎斯京城大主教蓋耶。巡行到院。遂求其准行聖月。大德主教欣然允准。即於是月二十日。建定耶穌聖心之聖月。且曰。我等行此聖月。求爲罪人回頭。用三十三天。誦經祈禱。以光榮

耶穌在世之三十三年可也。敬禮耶穌聖心之月。既行於彼院。爲時不久。卽徧傳於各處矣。此卽敬禮耶穌聖心聖月之來歷也。

遵行聖月之式

熱心敬愛耶穌聖心之功課。乃照聖母聖月之規模而立。其終向是爲恭敬吾主耶穌。在世之三十三年。全爲救人靈魂。光榮天主聖父而用。故聖月之天數。亦係三十三天。遵行之法如左。每日先以熱切之情。恭念獻已於耶穌聖心誦。然後加一存想之端。卽以其端作默想題目。默想完。一。念熱心短誦。此誦一日之中。亦可屢次呼誦。二。謹記宜行之德。此德俱對本題之意。三。呼求耶穌聖母二聖心三次。一年之中。不拘何時。皆能照此規式。或私行。或與衆公行。各隨其熱心之所好。然更合式之時。是西曆六月。因聖體瞻

禮大率逢於此月。而耶穌聖心瞻禮。則恒在此月也。熱心教友。在此月中。必能得最妙之法。以前進於諸德。而更前進於熱愛天主也。人皆知通功誦禱。在天主台前。比私自祈禱。更有能力。故多行。公同誦禱。我亦勸爾等。勉力公同作此功課。比如與同志之人。聞分此月之天數。每逢本人所分之日。當隨意選擇兩三樣德行之事。勉力實踐於行。且想自己。此日之本分。是將衆心應獻於耶穌聖心之敬愛。吾當一概代行也。

獻己於耶穌聖心誦 每日敬禮聖月時念

吁。耶穌。敬獻我心於爾。求置於爾聖心之內。我欲居爾聖心。用爾聖心以愛爾。我欲隱爾聖心之中。不求人知。惟求見知於爾。我將從爾聖心。覓得聖愛之火。焚化我心。由爾聖心。以得神力神光。真

勇真慰我心懦弱。爾心堅之。我心憂懼。爾心慰之。我心紛亂。爾心平之。吁。耶穌。願我微賤之心。作爾聖愛之臺。願我唇舌。不斷宣揚爾慈。願我眼目。不斷注視爾傷。願我明悟。恒思爾至可欽崇之美善。願我記念。常存爾恩之表記。吁。耶穌。願我一切諸有。盡彰我愛爾聖心之愛。今亦敬備我心。願為主受一切艱難。

吁。瑪利亞聖心。除耶穌聖心之外。爾乃極可愛。極慈悲者。求爾將我所獻。及我微愛。並我所定善志。轉獻於爾聖子耶穌之聖心。彼將愍然憐我。救我於苦患之中。耶穌之母瑪到亞。求爾今時作我恩保。後世在天。永爲我之元后。 亞孟。

第一日。論熱心敬愛耶穌聖心之來由。

這敬愛耶穌聖心。是同聖教會一齊併興的。因耶穌在十字架上。

被鐵鎗刺透聖心。就是爲信衆開了一個避難安居之所。聖教初興之教友。及致命諸聖。以堅信切愛。親主聖傷。遂能戰勝酷刑。視死如歸。想其親主聖肋之傷。默想主苦。能不念及耶穌聖心。及其無限之聖愛乎。而聖愛之火。即由聖傷孔中射出。以熱彼等之心。此皆必然之情也。及至後來。歷代有大德之聖。如聖奧斯定。聖伯納多。聖文都辣。聖女熱爾都德。聖女默弟爾德。聖女加大利納。瑟納等。早已明知敬愛聖心之妙矣。但是公然敬禮耶穌聖心之工。却在降生後。一千六百餘年間。始見於世。吾主創此熱心之工。以顯其仁慈所用之人。乃沙羅郡顧病會中之修女。聖瑪爾加理大瑪利亞也。吾主顯於其前曰。我心滿貯愛人之火。已不能容受其炎熱。當設法分傳於世人。使人得我心中所存之寶藏。以富其靈。

我心所存之寶。皆救拔罪人。脫離罪惡。及成聖緊要之聖寵也。後來不久。耶穌又顯現此聖女。更加詳明。示其聖意。聖女自述曰。聖體瞻禮後八日內一日。余朝拜聖體時。覺得受吾主格外寵愛。心情感發。切望以愛還其聖愛。吾主曰。爾欲以愛還愛。莫善於將我屢次命爾之事。竭力遵行也。因遂露其聖心。示我曰。此即我愛人至極之心也。爲愛人之故。萬苦不辭。至於流盡聖血。喪已生命。然而多人。不但不感我恩。反於我聖體聖事中。辱我慢我。冒領我之聖體。或冷心去領。然我更難忍受者。是獻心於我之人。亦如此辱慢我也。故我願爾於每年聖體瞻禮後之第九日。瞻禮六。做我聖心瞻禮。以補償我聖心所受之凌辱。此日當妥領聖體。以補我在聖體臺上。所受之侮慢。我誓許於爾。凡如此敬我聖心及勸人

敬我聖心者。我必將聖心之愛火。充滿其人也。彼時聖女謙遜答曰。吾主。爾與誰言也。主豈不知。我乃卑賤大罪人乎。豈不知我之卑賤。不足當主任用。反有礙於主之聖意乎。現有許多才德愛主之士。主簡用之。以成聖意可也。主曰。爾豈不知。我慣用微弱之人。以羞愧世俗之才能者乎。我慣用微小愚蒙者。顯我德能。令其不得絲毫歸功於己。爾豈不知此意乎。聖女遂答曰。既如此。求主即指示我遵行之法。主曰。爾可往見司鐸各隆陞。傳我之命令。令他竭力設法。立此熱心神功。以樂我心。我知將來不免許多阻難。你勸他不必失望。凡不仗恃己力。全心倚靠我者。無不可能也。聖女遂如命而行。鐸德各隆陞。久已細心考驗。深知聖女之德。今知其蒙主默示。確有明徵。況此神功。原屬極善極聖。無可疑慮之處。遂竭

力相助。立此極善之工。乃依吾主所示瑪爾加理大之規模。以身率衆。於天主生降後。一千六百七十五年。西曆六月二十一日。聖體瞻禮八日後之瞻禮六。將己獻於耶穌聖心。以盡敬禮愛慕之本分。於是此敬禮聖心之工。雖經多人毀謗議論。而竟創立於世。且傳佈甚速。迨經教宗明准之後。尤顯其傳之神速。瑪爾加理大預先曾云。我知立此神功。衆必羣起而攻之。然吾主耶穌。親口許我以必成。我固知其必成也。聖女之言。於茲驗矣。

宜行之德。一。勸己所屬之人。每逢聖體瞻禮後第九日。瞻禮六。恭敬耶穌聖心。二。勸其此日。妥領聖體。三。勸其此日。作一賠補之行。以補各處輕慢聖體。冒犯聖體之諸罪。

熱心短誦。懇求耶穌聖心。賜我聞爾聖德之馨香。緊隨於

爾後。歌詠經書

耶穌聖心。矜憐我等。聖母無玷聖心。爲我等祈。

每日默存畢。照此式呼求耶穌聖母二聖心三次。○有許多人自言念此短誦。大獲修德之進益。及恒心奉事天主之恩。

第二日。論耶穌所許恭敬聖心者。極厚之恩寵。

爲感發人心。舉行聖月之工。最好之法。是想耶穌所許於熱切敬愛聖心者之殊恩。耶穌明示於聖瑪爾加理大云。我告訴你。莫將我所預備之恩。留爲爾一己之用。須知此恩。亦是爲衆人而設。我用爾心如流水之溝渠。隨我之意。分流於衆也。耶穌又使他知。乃因愛人至極。始大開聖心之帑藏。啟示敬愛聖心之工。爲化極頑極硬之心。使之愛主。爲變冷淡懈怠之心。使歸熱切。故語聖女曰。汝當處處宣傳。諄諄啟誘。囑咐世俗之人。行此神工。如一穩準之

法。以得愛主之愛。囑神品修會之人行之。如一極效驗之良方。以獲本地位齊全之德。囑一切奉教人行之。如一極穩極妥之功課。以克勝極猛之慾情。以和睦極仇極怨之室家。以除年深日久之惡習。以發誠切愛我之熱火。且不必多時。易修極高之純全也。請問尙有何者。更勝於耶穌親口所許之異寵。能感發我等熱切敬禮聖心乎。耶穌又曰。凡專務救人靈魂者。果能熱切敬愛我心。必得妙法。感動極頑極硬之人心。所謀畫救人靈魂之事。必顯出奇妙之效驗也。

鐸德各隆陞。首覺此效。凡有求其指引修德之法者。即以此法囑咐之。從前嘗勸異教之人。用盡諸法。不見功效。後以此法。無不回心向化。至各隆陞。亦驚其效之神。從前有譏笑此工。而不屑爲者。

後偶遵行一二。即趣全心向主之意。有以此神功。得蒙豐厚之奇恩。大進於修德之路者。諸如此類。難以盡述。

近世一。太有名望之人。曾曰。幾時我想耶穌聖心。則一切事物。不能令我驚懼。倚靠聖心。我等即無所不能。雖處繁華塵俗之中。能不染塵俗之習氣。能守神貧。而度熱愛之神生。耶穌聖心。恒於聖父前。懇切轉求。賜我愛主之聖望。將要陷落於罪。耶穌聖心相助。即能不致陷落。不知不覺之中。即將我等心中。相反天主光榮之事。代爲滅除。遇難勝之阻當。片刻前。尙覺戰驚畏懼。不能勇決。聖心來助。即能勇往直前。耶穌聖心。又給我等說破世俗之偽論。發露其奸詐。而去其誘惑之力。是一切諸善。無不自耶穌聖心而來。則於諸事之上。求其聖心。作我等之嚮有可也。今將我等神形諸

有。盡獻於聖心。不使一物。不經聖心烈火焚化。直至將我煉淨之後。提出於世。永遠置於愛火之中。 亞孟。

宜行之德。 此聖月內。不令一主日。空空放過。務要談論耶穌聖心。及宣揚吾主所許於敬愛聖心者。無窮之寶藏。

熱心短誦。 吁。耶穌聖心。賜我愛爾之愛。我即富厚無比矣。 聖依納爵  
第三日。論敬禮聖心之首效。即是愛主。

吾主耶穌新定之律。一言可以盡之。總歸於愛而已。此即吾主耶穌所稱自己之律。其言曰。所命於爾。惟相愛耳。其意若曰。吾最大惟一之誠。即是命爾愛我。並命爾彼此相愛。如我愛爾也。爾遵此誠。人即知爾是我之徒。聖保祿宗徒云。能愛者。即全守主誠矣。  
吁。耶穌爾既命我愛爾。又許爾亦愛我。我將何以報此恩乎。

吾人勉力盡本分。勞苦戰攻。無非爲得獨一之至寶。即愛主也。若現有最甘飴。最容易穩妥之法。可以得此至寶。豈非極可珍重之法乎。然而此法。人人皆有。隨手可用。即是熱心恭敬耶穌聖心也。前已說過。愛主之愛。非他人所許。乃耶穌親口所許者。主曾向瑪爾加理大曰。我今許於爾。凡敬我聖心。與勸人敬我聖心者。我即將我聖心之愛火。充滿於其人也。又曰。敬禮我聖心之工。能動極頑極硬之心。使之愛主。使冷淡懈怠之心。歸於熱切。瑪爾加理大至書於友曰。任彼仇魔。百計阻撓。吾主必將爲王於我等心。因敬禮聖心之工。第一終向。是爲感化人靈。回心愛主也。欲明敬禮聖心之工。實有此效。亦非難事。因此神功所發顯者。無非聖愛也。其所敬者。耶穌充滿聖愛之聖心也。其終向。乃賙補其聖愛所受

之侮辱也。其所力行。皆習練聖愛之功也。至令人默存者。皆能生發聖愛之端。如記念感謝耶穌所施之諸恩。更感念其聖體聖事一內。所施之恩愛。是也。

凡憐憫吾主耶穌。在聖體櫃中孤獨無人往見。及受教友簡慢冷落。其聖愛之苦。而朝拜聖體。陪侍耶穌。或神領聖體。迎之於心。或每日多次。在聖臺前。虔恭熱愛。俯身叩拜。以補耶穌所受之侮辱者。則耶穌之慷慨好施。必以無數奇恩。施於其人。耶穌決不薄情。必以愛還其愛。而且超過百倍。此係耶穌親許。且又誓不食言也。主曰。愛予者。予父亦愛之。我亦愛而顯現於彼焉。

夫世人相許。若有誓不失信之言。則人信之矣。今吾主誓不失信。誰還疑其言之不真耶。噫。今而後。我等宜滿心倚望。同聖若望宗

徒。三復斯言曰。我將生活於耶穌基利斯督之信。彼曾以愛許我矣。近世又賜其聖心於我。以爲憑據矣。

聖女日爾都德行實記云。一日。聖女蒙聖若望宗徒顯現。聖女問其晚餐時。曾倒憩於主懷。何不將主聖心之妙。載之於書。以訓世人乎。宗徒答曰。彼時聖教初興。我惟記載聖父無始物爾朋之聖言。以訓世。至其聖心之甘飴。天主留爲衰敗之世。用燃將熄之愛火也。宗徒與聖女所預言之時。我等正逢之矣。大半教友心中之愛火。皆已將滅矣。然而敬禮聖心之熱心。廣傳四外。將又燃其愛火。我等何不堅倚切望哉。

宜行之德。善望彌撒。耶穌聖心極願吾人識之愛之。願人以倚望之心投奔之。尤願以彌撒大祭。投奔於彼。今欲令爾熱心

愈熾。當思一切天朝諸聖之功。全聚於一處。亦不若一臺彌撒之光榮。天主再思。望一臺彌撒。所得聖寵之實效。遠勝爾一生。誦念別樣經文之益也。多有人望彌撒時。不知何所作爲。若能用心默想耶穌苦難。及其聖心之憂痛。何等之德不能修。何等愛主之情。不油然而發乎。

熱心短誦。吁。耶穌聖心。誰能使我。不愛爾乎。聖保祿

第四日。論敬禮耶穌聖心之着落終向。及與恭敬聖體之異同。熱愛耶穌聖心。乃敬德之行也。所敬者。即是耶穌。至可欽崇。至愛人。而却被人辱慢之聖心也。從此可知敬愛聖心。非只欽敬其聖身內。與吾人相同之肉心。尤欽敬其愛人。無限之愛情也。但吾人於一切敬禮之功。必賴有形之物。以啟其念。方可易行其工。故吾

主耶穌以其有形之心。賜於吾人。使易記念其聖愛。夫人一身之體。心爲愛德之府。凡矜憐憫恤之情。皆由心發。吾主亦有此心。我等既當盡心恭敬耶穌聖體寶血。豈不更當欽崇其聖心乎。論敬禮聖心。第一終向是盡我所能。用朝叩。愛慕。感謝。奉獻。以敬其愛人無限之聖愛。而更致敬於可欽崇之聖體聖事。因耶穌於此聖事。顯其愛人之心。而此愛人之聖心。少有知之者。即有知之者。亦少能盡心愛慕也。

第二終向。是用盡各法。以補耶穌在世時。爲愛吾人。所受之凌辱。及每日在聖體中。所受之侮慢。故此項熱心所敬者。即是耶穌大發愛火以愛人之聖心。其終向。即是補償耶穌聖愛。所受之侮慢。其益處。即是能得愛主之熱愛。及無數之奇恩也。

論敬主聖體。與敬主聖心。稍有分別。恭敬聖心。乃專敬耶穌之心。而不論及其聖體。恭敬聖體。乃統敬其隱於麪酒形內之全體。不分論其心。恭敬聖體之終向。乃敬耶穌相結天主第二位之聖身。以其允當受神人之欽崇也。恭敬聖心之終向。乃特敬其與天主性相合之心。爲感念其炎炎愛人之熱情。又爲補償其爲愛人所受之辱。及每日在聖體聖事中。屢受於人之辱也。

由此觀之。恭敬耶穌聖心。與恭敬聖體。其所敬雖不相同。其意趣實不相離。故我等雖分愛於聖心。不惟不減恭敬聖體之熱心。且加其盛。成其美也。噫。聖心之在聖體中。實係無價之至寶。若我等不獲其益。非因他故。乃不善用之故耳。吾主曾顯於聖女默第而德。命其盡心竭力。於聖體聖事內。切愛聖心。又將己心。送與聖女

爲己聖愛之表記。爲聖女生時死候。避難之安居。自此以後。聖女即生一格外之熱切。以愛耶穌聖心。是以得受無數奇恩。故聖女嘗云。我若盡載所受於耶穌。至可愛聖心之恩。必須成一大部書也。

宜行之德。每日獻己行實於天主。此不但是熱心之事。亦乃分所當爲之事也。天主生人於世。原爲恭敬天主。故我等當盡忠於此。然欲令所行有功。更能悅主。必須同耶穌之聖心奉獻。方可。比如照此式而獻曰。吾主天主。我將所行。相合於耶穌聖心之功。與童貞聖母。及諸聖人之功。並合今時後世一切之善。盡獻於爾。以補償今時後世一切之罪惡。或用耶穌親示聖女默第而德之式。曰。我可愛之耶穌。我將今晨初醒之第一喘息。先獻與爾。求

爾收納我之諸行。用爾甘飴聖心之火。焚煉清潔。相合於爾無限功勞。以獻於爾之聖父。以爲頌揚於無窮。

熱心短誦。 雀有穴。鴿有巢。以居其雛。吁。耶穌爾之聖心。即我之安居也。

第五日。論耶穌聖心之尊貴奧妙。

努阮曰。我細體驗耶穌聖心之異。實足令人識其奧妙尊貴焉。蓋耶穌聖心。所具之靈魂。乃極全極美者。乃天主全能寶藏中。最奇妙之工。再無出其上者。當耶穌聖靈與其聖心初合之時。即將一切聖寵榮光。全帶入其中。故聖心之動用。皆極大方慷慨。聖心之所趨向。皆極尊高。聖心之資稟。極英明仁聖。合萬衆之心。難比其聖善之絲毫。再無他心。可比耶穌聖心。愛我等之切。或如此矜

憫我等之疾苦。如此深謀遠慮。以求我等之益。憂我等之憂。樂我等之樂也。耶斯博曰。雖普世之人心。皆拒絕爾。爾亦勿憂。因耶穌之聖心。恒忠信而恒開也。

吁。吾主耶穌。果是如此。雖吾靈之仇。列陣圍攻。我避於爾聖心中。我即毫無所懼。我雖與強仇交戰。賴爾聖心。我必大獲全勝。我雖一足已入地獄之門。我仍不失倚望於爾聖心也。

耶穌聖心之聖。與天主聖性之聖相同。是以聖心中。一切動情哀嘆。一切之祈求。願望。作爲。皆隨耶穌天主位之尊。而有無窮之價值尊貴。則格外敬禮聖心。乃義所當爲。因乃敬其天主聖位故也。救贖世人之經營謀畫。既出自耶穌聖心。又成於聖心愛人之熱愛。則吾主爲救我等。聖身百骸所受之苦。皆可歸功於聖心也。耶

耶穌聖目。泣辣匝祿於墳。又泣將滅亡之日。路撒冷。藉以哭我等靈魂。及患世之凶禍。其聖舌傳播福音之真道。以誨吾人升天之路。其聖手。撫摩病人。死人。而療之活之。其聖足。周遊跋涉如善牧。尋覓亡羊於歧路。在山園祈禱。憂悶至極。通體出流汗血。百肢顫慄。疲憊。其聖喉。大呼於十字架。下震地獄。上徹重霄。俾聖父視其顏面。聞其聲。而聽其求。皆耶穌聖心。發之使之。則皆聖心之功也。我輩所受一切諸恩。既皆來自聖心。當如何敬愛其聖心乎。噫。若將一位宗徒之心。置於我等目前。以伸敬愛。則我等之信德熱愛。踴躍歡忻。爲何如也。耶穌之聖心。已示於我矣。他聖之心。較此聖心。直同空虛缺欠。現今真真寓於聖體聖事之內。其聖心之一動一息。無非求爲我等之利益福樂。而我等。尙如此冷心無情。何也。

吁。我主耶穌。今而後。我決不如此矣。我今信爾。敬爾。愛爾。更求加增我之信愛焉。

聖女嘉辣。無一日不朝拜耶穌聖心。格外加工。盡其虔愛之誠。主欲酬聖女之熱切。凡其敬拜之際。即以極純之淨樂。充滿其神魂。宜行之德。勉效聖女嘉辣之行。無日不恭敬耶穌聖心。若爾係聖心會友。每日午前九點鐘。午後四點鐘之功課。務須謹遵勿缺。且念功課經時。勉令心口相應。因耶穌之所欲得。惟爾之心。耶穌之所視。亦惟爾心也。

熱心短誦。

吁。耶穌。我將在爾心中。安然寢歇。聖詠

第六日。仍論耶穌聖心之尊貴奧妙。

吾主耶穌之聖心。以其廣大。以其威權。以其功績。爲衆心之君王。

論其廣大。遠勝萬心。而包括萬心於已內。論其威權。能使衆心。聽其安排。能知衆心之隱微。能隨意轉移之。且聖心之好施。聖心之可愛。聖心之愛人。實當得起管轄之尊權。因聖心之被傷被刺。無非爲醫衆心之傷。所流聖血。無非爲洗衆心之罪污也。其聖傷即其冕旒也。其十字即其權柄也。其管轄我衆名正義順。若我等不遵其政令。難逃背逆之罪。因吾人之所有。皆屬於彼。又難免愚痴之誚。因其所令。皆利於我輩者也。其催促我輩獻已與彼。惟爲令我輩得福。令我輩成聖也。

今我等速行恭敬聖心。因其尊大無比也。欽崇聖心。因其乃天主之聖心也。隨其引導。因其乃萬世諸善。不易不移之準則也。屈伏我等之愛欲於彼。因其爲衆心之君王也。視其心。如帝王御璽。印

於吾心。使我心亦帶聖心之像。經云。印我於爾心。如印記然。聖安瑟爾默解此經。謂耶穌之意若曰。汝當令我隨意主掌爾之心意。作爾一生諸行之導引也。聖盎博羅削曰。當印吾主於我額。我心我臂。印於額。以明明承認我之信德。印於心。以令吾主之愛。恒王於其中。印於臂。爲不斷力行善功。以增天主之光榮。使我之言語。心情行爲。皆效耶穌之尊大。是以我衆信友。若爾覺貪高之念。以其虛樂。誘惑爾心。或以虛榮之光。炫耀爾目。爾當舉目向天。依聖熱羅尼莫之所云。傾耳細聽淨友之言曰。將我如印。印於汝心。汝臂也。夫印主於心。旣係耶穌聖心之切望。今即懇求於主。轉移我等之心。皆向於彼。且求主變化衆心。使聽主請。主令我輩。投奔於彼。其言曰。爾貪世俗僞樂。而不得以解渴者。皆來投我聖心。我心

爲真樂之總滙。活水之清泉。足解汝渴也。貧於聖寵之產者。俱來飲於此心。任意收取急需之物。且不用銀錢置買也。爾輩何苦枉費心思。營求不能稱心之假物。我心乃真富不竭之源泉。取之不盡。愈多取。我心愈樂也。

宜行之德。藉耶穌聖心。每日獻爾於天主。此乃令爾經言。有功有效之法也。瑪爾加理大。奉獻之式曰。吾天主。我以可愛聖子耶穌之心。奉獻於爾。作我謝恩之禮。作我之祈求。作我之奉獻。作我之欽崇。作我一切之善志。永遠聖父。求爾納我所獻。以補我所缺之善。我無別物可獻。以稱爾尊。爾既將聖子耶穌。賜爲我物。由我享用。我即將吾救世主耶穌。獻爾可也。

熱心短誦。吁。耶穌聖心。聖愛贖罪之犧牲。求爾息怒。憐我

堪憫之罪囚。

第七日。仍論耶穌聖心之尊貴奧妙。

耶穌聖心。乃一祭臺。在此臺上。曾獻過贖世之大祭。爲造物主所極歆享者。我等亦當於此臺上。奉獻一切心愿。因造物主惟此於處。納我獻。聽我求也。凡受造者。所曾獻過之光榮讚頌。祭祀欽崇。與其慕愛之情。皆耶穌聖心所默佑者也。然其光榮讚頌。較之耶穌聖心。欽崇天主。難比毫釐。因獨耶穌聖心。能稱天主之尊。以愛之敬之也。

我等所能悅主之事。未有過於獻聖子之心。及其欽崇敬禮。於天主父者。欲得我等所求之效。最穩之法。即是托靠耶穌聖心。當同達味聖王求主曰。垂爾仁慈之目。俯視於我。然我所爲。無不應受。

重罰。故求爾惟視可愛聖子之聖顏。及其聖心可也。求爾惟從耶穌聖傷之孔。而視我焉。其傷乃求恩得恩。無所不能之傷也。求爾記我微賤受造之物。勿棄爾仁慈之手工。全能之遺跡。

聖女日爾都德。一日與衆修女。同在聖體台前默想。見衆修女無不受耶穌之寵。有如聖心接聖寵者。有從聖手接者。亦有從釘穿之聖足而接者。各依相距聖心之遠近。而分受恩之多寡。距心更遠而接者。僅能得其所求。直向聖心而接者。得滿其所望。速而且易焉。

經記天主命亞當睡熟。取一肋骨。造成厄娃。以爲之配。而耶穌死於十字架上。亦如熟寐。一卒持鎗。刺開心肋。血水併流。以表聖洗聖體兩端。而聖教會賴此兩端。以生以存。故聖保祿宗徒。及諸博

學之聖。皆謂聖教會。出自耶穌之肋。亦如厄娃。出自亞當之肋。耶穌之開其心肋。正欲使聖教會。得此出自耶穌聖肋之光榮也。有一熱愛聖心之人。曰。我何時想念聖心。即自欣慰云。耶穌聖心。乃我生處也。居處也。葬處也。耶穌聖心。我初生之胞衣也。我平生之安宅也。我死後之墳塋也。噫。人於生時死候。能同此意而言者。真福人哉。

聖教初興之信友。衆人如同一心。此不足怪。因耶穌之聖心。生活於彼輩中。默佑啟迪。令皆愛慕天上之事也。此誠盛世也。我等各當盡心竭力。身先衆人。立全心熱愛耶穌聖心之表。又以祈禱。以善功。合耶穌聖心之所禱善功。求主賞賜今之信友。俱效法聖教初興之信友。共成一心。以愛聖心。共合一音。以頌聖心。共具一魂。

合其諸司。盡獻於耶穌。以爲愛慕榮頌焉。

宜行之德。耶穌聖心。實乃各信友之所從生。蓋因聖心之功。始蒙天主賜以聖洗之神生也。汝能今作一最樂聖心之事。即是每日初醒。復新爾領洗之聖願。曰。吁。耶穌聖心。我棄絕魔鬼各樣虛假光榮。我棄絕魔鬼各樣之事。今將我之一生。全獻於爾。不遺分毫。噫。汝果習行此工。能得無數聖寵。且易退一切魔誘也。

熱心短誦。吁。耶穌聖心。凡不愛爾者。是皆可棄之人也。聖保祿第八日。論耶穌聖心愛人之切。

耶穌既具諸德諸美。至尊至貴。而又極愛吾人。超於分外。其言曰。予之樂。在與人交遊也。其良善可愛。致其兇狠之仇。亦驚訝嘆服。主仇曾送一失節之婦。至吾主前。令判其罪。吾主不忍判斷。且隱

示其情。使控訟之人。懷羞而退。其與罪人周旋。不忍拒絕。不嫌與  
征稅之吏。同席飲食。致令仇者。呼爲罪人之朋侶。再看投奔耶穌  
足下之瑪大肋納。乃有名罪婦。因其一旦回心愛主。主即赦其一  
生肆淫惡表之罪。吁。瑪大肋納。爾得進見聖善之師。非爾開其端  
也。當爾未伏於聖足之下。濯之以淚。拭之以髮。耶穌早已叩爾心  
門。候爾多時矣。其赦爾之多罪。雖曰。因爾多愛之故。實因主多愛  
爾也。

吾主之愛。更及於無知之孩提。夫孩提之幼。尙不知主爲誰。不知  
感主之慈愛。而主之良善。已招之追隨。圍繞矣。門徒呵叱衆孩。主  
曰。勿阻也。任孩近我。遂懷抱之。撫摩之。降福之。不以爲嫌也。經曰。  
母雖忘其穉子。我必不能忘也。誠哉斯言。再觀喻言所說。敗子回

頭俯伏於父足下。自認不堪爲子。其父如何收納之。一知敗子悔過。速往迎之。抱頭相哭。只因一悔之故。即復其家產。復其父心之恩寵。蓋耶穌以之自喻也。再思耶穌疲乏於道路。坐於古井之旁。以俟來汲之罪婦。然實吾主聖心。暗中催促。使來汲取有形之水。爲賜以常生之活水。主先啟發婦心之神渴。而婦尙不知也。耶穌不嫌以辣匝祿爲友。於其死後。則痛泣流涕於墓前。致令如德義之輩。咸驚訝曰。其愛辣匝祿。竟至斯也。主預見日路撒冷。因罪惡貫盈。將受圍攻滅亡之患。涕泗交流而哀之曰。日路撒冷。日路撒冷。我屢欲召覆爾。若雞覆其雛。而汝固執背逆。竟不欲也。其待宗徒等。之忍耐良善。更難以言傳。茹達斯負之賣之。尙稱之爲友。晚餐時。與衆徒叙別。不啻千言萬語。昭其愛情。皆陞之爲友。

曰吾已不呼爾輩爲僕。乃呼爾輩爲友也。伯多祿三番背棄。主仍不怨不尤。惟以慈目回視。令之慘悔苦泣。總而言之。吾主一生之所著。無非慈愛吾人。雖爲我輩汗流困憊。不遑眠食。心猶不足。彼曾云。善牧者爲羊失命。彼真爲羊失命矣。受難之先。旣愛其在世之徒。而將別之時。愛之更切。至終不變。聚其徒於大廳。與留以深情。奇愛之記念。噫。實天地神人不能思意。不能名狀之奇恩。真無量聖愛之奇思妙法也。夫牧羊者。衣羊之絨。食羊之乳也。吾主不然。乃以己爲羊之飲食。愛羊如此過分。至欲與每羊同爲一體。與之同居。直至世界窮盡。以伴慰其流徙之苦。其聖躬之傷痕。盡如能言之口舌。代罪人呼求恩赦。代義人求加聖寵聖愛。直至世終而後已。又何能盡言其慈愛耶。

宜行之德。遇憂苦患難。速投奔於耶穌聖心。一日聖女日爾都德。將憂苦訴於吾主。吾主命其倒於聖心。曰。此係爾避難之所。當於此處游優靜息也。爾何時遠離此處。則苦心之事。必將及汝。然正如苦口之藥。令爾知。惟我乃無所不能。獨一無二之安慰也。今我輩當效此表。凡遇憂疑煩苦。及一切艱窘患難。即投奔聖心。如投慈父。如投密友。求其作我等之光照。作我等之倚靠。安慰更不於聖心之外。別求幫助安慰也。

熱短心誦。我已得吾主耶穌。吾君吾王。吾昆吾友。甘飴慈善之心矣。上天下地。吾復何求哉。聖伯爾納多。

第九日。耶穌聖心。極願結合於人心。

火之炎雖烈。石之墜雖猛。江河之流雖急。未若耶穌聖心。欲結合

人靈之急切也。人能去其罪過。不阻耶穌聖愛之效。則更莫能形容矣。吾主默示聖女加大理納云。我因愛人之故。雖怒罪人亦不斷愛之。而求合於彼。且時時啟發其本性好合之情。以成此合好也。夫我當未生之先。吾主聖心一息一動。已無非爲救我之事也。所思所想。無非願以己賜我也。所營謀籌畫。無非爲我之利益也。聖心之愛我心。竟不辭親臨叩我心門。而求入也。

吾主顯示聖女日爾都德曰。吾心之動有二。以成救世之大工。一爲罪人。一爲義人。爲罪人而動。以籲禱於吾聖父。息其怒。啟其慈。以矜宥罪人。爲義人而動。與我簡選者叙談。勸其互相友愛。以恕罪人之失。以代罪人轉求。動而向於罪人。以溫良慈善。勸其悔過贖罪。俟其回心。定志改過。動而向於義人。親之近之。令其日日加

增愛我之愛也。且人心之動。原不間於視聽言動諸司之作爲。我亦如此。雖掌管天地萬物。不能片刻或減或緩。我聖心中之動也。噫。吾主爾曾有言。汝寶何在。汝心同在。主旣無時不想念我輩。可知我輩爲爾之寶矣。吁。無言可言。聖愛之天主。識爾者。何其少耶。爾旣無一人不愛。何爲衆人。俱不識爾耶。何爲普世萬彙。不俱揚爾讚爾。使知愚賢否。皆歸向爾耶。

噫。吾主爾旣如此切望吾心之愛。急求結我心情。故達味聖王。稱爾爲我等人心之天主。此不足怪。我獨怪人心。反辭爾避爾。不肯決意自獻於爾。嗟乎。吾主天主。爾之聖心。如此尊大。如此聖善。如此純全。竟肯愛我。且命我愛爾。噫。以爾之尊美可愛。若不得愛時。尙當懇切跪求。容我愛爾。今乃冷心不愛。豈不愚哉。我有何德。至

令爾舉揚我。到愛爾之榮位。至今爾願結合於我心。且至今爾時時想念我乎。我之身軀。不過一撮塵灰。我之神魂。不過埋沒爾恩之墳墓。我之心思。明悟記念。不過頑梗無情之木石。不過忘恩背德之暗冥而已。爾何所愛於我乎。又何能愛我。且許我愛爾乎。造物之主。如此愛其所造之人。至於無可名言。不但令天神聖人驚異。亦且爲邪魔之所大忌也。蘇理諾述。一魔爲聖教經言所迫。自認曰。我徧遊普地。見人間之大事。如軍機戰畧。籌畫經猷。名邦大國之政治。高樓廣廈之富麗。百般技藝之奇巧。文人博士之學問文章。不一而足。我俱鄙之笑之。不啻如蚊陣蟻穴。我獨一之急務。卽是阻擋天主愛人之愛。寧捨一切異端之大邦。而入教民之處。以擾亂定志事主者。但能阻得一靈。不合於天主。卽我之大樂也。

天主既如此願得爾心。魔鬼既如是妒恨此事。爾即當把心全獻於天主。以苦仇魔之心。噫。天主所愛之人。當全心愛主。天主造爾心如此大。如此深情厚意。如此貪想不足。正爲使爾向彼得彼。以充其量。以稱其願也。

宜行之德。懇求天神助爾。讚揚愛慕耶穌聖心。聖瑪爾加理大傳中記。天神偕聖女。時時光榮。愛慕讚頌耶穌之聖心。故爾當祈求天神。更求爾之護守天神。求其以己之熱愛。以己與吾主聖心不斷之締結。補償爾心之冷淡。助爾祈求之不足也。凡與他人應酬交接之際。亦當暗求其護守天神。默牖其人。熱心恭敬耶穌之聖心。

熱心短誦。吁。耶穌聖心。我今仰望投奔於爾。如渴鹿之奔

清泉也。聖詠

第十日。論耶穌聖心之富。

聖瑪爾加理大曰。吾主曾默示我。因其切望世人。全心愛之。故於近代。顯示聖心於世人。作其聖愛之表記。招愛之奇法。又大開其聖心之寶庫。廣施其恩於光榮愛慕聖心者。

有一賢者曰。耶穌聖心。乃諸德之座。萬福之源。衆善靈魂安憩之所也。可欽崇之聖心。其愛人之火。恒燃不熄。其門恒開。以施各般聖寵之膏。澤於世人。恒憫人之苦患。恒俟人隨時投奔。作爲避難之處。作爲安居之宅。作爲現世之天堂。凡爾負十字架者。被魔誘者。遭窘難者。俱投聖心之內。聖心招爾。俟爾催逼爾聖心欲輕爾任。曰。凡受憂苦。負重任者。皆來我前。我將輕爾任。慰爾憂。此言特

爲我等而發也。

聖達彌益云。於可欽崇之聖心中。吾能取兵刃。以自護圍。可覓良方。以療諸疾。可獲助佑。以勝強仇。可蒙極甘飴之安慰。以輕吾苦。可得極淨之歡娛。以滿我心之樂也。凡內患侵爾。外仇攻爾。舊罪之罰嚇爾。凡覺心中恐懼不寧。或被私欲擾亂之時。爾即速奔聖臺之下。投爾於耶穌之懷。且藏入聖心之中。此乃避難穩妥之處。此乃善靈安歇之所。無憂無懼之樂鄉。天富之府庫也。聖多瑪斯述。有名畫工。繪童女二人於苦像架旁。接收聖傷所流聖血。一則謹慎收藏。一則傾之於地。一乃頭戴珠寶嵌鑲之榮冠。一乃墮其寶冠。一者欣然光彩。一者感然而暗。先一女。乃善靈之像也。以默想之功。從吾主聖心。得承歡樂。而接受光耀之冕。後一女。乃罪人

靈魂之像也。因其犯罪之故。失却三樣無價之至寶。即聖寵之光。明淨心之安樂。身後之榮賞也。

聖伯爾納多歡呼曰。吁。至甘飴之耶穌。爾聖心中所含之寶藏。何其多也。我若欲富。甚爲容易在爾聖體聖事之內。我就能全得此無窮之珍寶。只緣我不善取用之故。致失如許之富。吾主親口許過。凡仗其聖心求恩者。所受必多於所求也。故凡以活潑熱切之信德。敬禮聖心者。從前屢求而未得者。用此法。即得其所求之效焉。聖女日爾都德。一日望彌撒時。聞聖經之言曰。我將以此地賜爾。及後世子孫。其時見耶穌。以手指心。示聖女曰。爾知予所言之地。爲何地乎。聖女明此聖愛之寓言。即向主聖心歡呼曰。爾真福田。爾真樂土。爾生真福之嘉禾美粟。其一粒之微。即可充滿被選者。

之嗜好。聚人心中所能想像。一切可貪可慕。快心樂意甘飴之事。不能比其萬一也。

宜行之德。爾已知耶穌於審判之末日。定厥簡者。永生之案曰。吾父聖福者。皆來就我。因我飢。爾曾食我。我渴。爾曾飲我。我裸。爾曾衣我。此言之實義。原指賙濟貧人。故我等宜恒默想此訓。而力行之。因後日永遠賞報之厚薄。皆以我等待弟兄之薄厚爲準則也。然可歎有許多教友。且無論愛人。即於耶穌親身。尙皆怠忽冷淡。使耶穌在聖體聖事內。真成一貧窮之人矣。故又當留心。使聖堂近主聖體之祭器祭服。皆整齊明潔。各盡己力。或洒掃聖堂。或刺繡槩洗。聖堂中之祭服巾帨等類可也。

熱心短誦。 吁。耶穌聖心我何愛爾之晚也。 聖奧斯定

第十一日論耶穌聖心之痛苦。

最先深刺吾主聖心者。並非鐵鎗。蓋吾主降生之初。已被聖愛之利刃。刺透其心矣。此係吾主第一大傷。欲自掩而不能者也。歌詠經書曰。吾妹配兮。爾傷我心矣。耶穌聖心又爲矜憐我苦之利刃所傷。我有多少疾病患難之苦。聖心即被多少創痛之傷矣。又爲痛哭我罪之劍所傷。耶穌聖心。全承任普世罪人。當發之痛悔。亦如後日。聖身全承任其當補贖之苦也。此一十字。比加爾瓦畧山釘死之十字架。更大更重。以其始於吾主之生。終於吾主之死也。聖婦安日辣曰。吾主後日將受之苦。於有生之時。即盡現於其明罰之內。而苦虐其心矣。吾主不但粗知其苦之大概。亦且縷析分明也。凡其在世三十三年。將受一切憂苦之情景。時時不離其心。

目預知將來見棄於本徒。一賣之。一背之。餘皆捨之而逃。已則被縛被擊。掌頰唾面。被控告。被妄證。被鞭笞。戴茨冠。肩負十字架。赴加爾瓦畧山。被釘被殺而死。死後尙被鐵鎗。刺穿聖肋。此等萬苦之景象。吾主平生。未嘗一時一刻。不思不見也。只因預知此苦之故。遂使耶穌一生。恒受不可測量之憂苦。從此可知。吾主聖心之痛苦。爲如何慘酷也。

試再聽聖女瑪爾加理大之所述。亦可如聽耶穌之親言也。聖女曰。一日堂中明供聖體。我在聖臺前。吾師耶穌。忽現於我身。發大光。其五傷之輝耀。超越日星。見吾主人性之聖身。愛火四外燦飛。而聖胸間。比他處更發光明。其炎熱烈於洪爐。我見其可愛之聖心。爲他處光燄之所從出。時吾主將其聖愛中。不可言傳之妙。啟

示於我。使我知其愛人之極。而所得於人者。不過背恩負義。冷淡無情而已。吾主曰。此實我極疼痛。極難忍之苦。遠過於受難時。所受諸苦也。因我之心情。若得人以愛還愛。則我爲人已受之苦。已行之事。俱不足以充我愛人之情。倘能爲人再行更大之事。再受更大之苦。亦所甘心也。雖我愛情如此。而人仍以冷心報我之情。冷眼觀我之苦。此我所最難忍受者也。噫。我等若能恒憶主苦。又何能不忍己苦耶。我等之苦。比耶穌聖心之苦。暫而且輕。何足算苦耶。吁。吾主爾僕十字若望。恒想爾苦。爾問之曰。汝事我殷勤。欲求何賞。若望答曰。不求別賞。惟求爲爾受苦。爲爾被人輕慢。聖女德肋撒。滿心同此意見曰。或令我受苦。或令我速死。人果然常記念主苦。則二聖所求無足怪也。吁。耶穌。若我荒蕪退怯之心。不能

生發如此慷慨之願。至少也該定志。以後安心承受爾所賜之苦患也。

宜行之德。吾主耶穌。令聖女瑪爾加理大。將每月之第一瞻禮六。定爲記念其聖心痛苦之日。爾亦當按汝所能。於每月第一瞻禮六。恭領聖體。並念獻已於耶穌聖心誦。獻此兩樣。以補爾一月中之疎忽怠慢。若於補爾缺失之外。又代衆教友。補其怠慢之罪。則更樂耶穌之聖心矣。

熱心短誦。吁。耶穌聖心。受盡諸辱者。求爾訓我以忍耐之德。擔承一切侮慢逆心之事。

第十二日。論耶穌聖心之傷。

吾主耶穌諸傷。皆救靈之門。恒開以待世人。而聖心之傷。乃更高

大寬敞之門也。吾主諸傷。皆湧流聖寵之源泉。而聖心之傷。則更清更甘之泉也。吾主諸傷。皆爲彩色之池。我輩靈魂諸司。入於其中。可使所發之思。言行爲。倍增其貴。而聖心一池。更能增其顏色之鮮美光明。珍重可貴也。吾主諸傷。皆長生冊上之字跡。以載成聖之學問。而聖心所含之學問。更能使我博通精奧也。吾主諸傷。皆避難之所。窮兇極惡之人。亦可入以避災。而聖心之傷。乃更便更穩之處也。吾主聖心之傷。乃善爲言辭之舌。密談於衆心之內。宣揚耶穌愛人之愛。又時勸人以愛還愛也。

聖伯爾納多曰。吾主可欽崇之聖心。所以被戕者。蓋欲以此有形之傷。明其聖心中。被聖愛之劍。所刺無形之傷也。噫。吾主不惟令其聖身被刺。亦且令其聖心被戕。尙有何者。能更顯其聖愛於我

哉。聖女加大利納瑟納默想時。問天主曰。爲何吾主既死之後。猶欲使聖心大開乎。天主答之曰。吾聖子救贖世人之切望。乃無限之望。其聖軀忍痛受刑。尙以爲有限。以有限之刑。不能發明其愛爾無限之愛。故以其心示爾。令爾視其隱密。知其愛爾之切。遠勝於其聖死所能發明者也。

吾人在世。所遇愁苦。每致害於靈魂。故耶穌創一妙法。使我等入居於其聖傷。更欲我等。入其聖心之傷。以得歡樂安慰之根源也。真福之恩理格。號徐松者。一日忽起大憂。深慮後來不得救己靈魂。忽聞空中有聲。安慰曰。爾且起。入居吾傷。汝獨一之真福。即在此也。聖奧斯定曰。我何時想起吾主之聖死。雖我罪之重多。不能驚嚇我也。因我之罪惡雖重。不能勝我主聖死之功也。

聖文都辣嘆曰。吁。可愛之傷兮。我由爾。已入吾主聖心聖愛至密之處矣。吾即在此築居矣。在此得享極大安飭。至於不可言傳矣。吁。嗟。亞當之子孫。何盲瞽之甚。不循吾主聖傷之捷徑。以入居吾主耶穌之內。耶。嗟。爾盲瞽之人。可信我言。若由聖傷之門戶。入見吾主。即獲安宅。居士之內。肉身尙得安靜。况靈魂之樂。又何能言傳哉。

宜行之德。每主日內。當定一日。格外恭敬耶穌聖心。如瞻禮六最好。因此日乃聖教會特定恭敬聖心之日也。凡遇此日。朝拜聖體。工夫須畧長些。又虔閱敬禮聖心之書。此乃保存爾熱切敬愛聖心之法也。愛火之膏油也。若膏油不斷。則恐爾熱愛漸減是也。

熱心短誦。吁。耶穌。願我心目。恒向望爾聖心之傷。

第十三日。論耶穌聖心切望之事。

細想耶穌聖心。得知其更熾更猛之切望有四焉。第一。是晚餐時與門徒所說者。曰。予久望與爾等同食此巴斯卦之羊羔矣。此言之意。令我明知。當以何等熱愛。去赴聖體神筵。而食天上之神糧。又令我知吾人望領之切。遠不及其望賜之切也。蓋聖體聖事。乃吾主一生行跡之總匯。既立之後。吾主喜其畢生之工程告竣矣。立此聖愛奇蹟之後。已別無可行。只俟爲我人受難受死而已。吾主又曰。我當受苦死之洗。然我渴望。欲其速成也。此其第二熾切之望也。大顯其聖心之愛人無厭。夫此洗。非水洗。乃以其所流聖血爲洗也。耶穌聖心。視十字架如祭臺。以成贖罪救世之大祭。

故如此切望其成。而焦心盼望其至也。

其第三更切之望。是渴欲救人之靈魂。致其心情如焚如炙。故在萬苦齊攢極痛極苦之際。大聲曰。渴呼耶穌。何者焚爾之心。令爾乾渴若此乎。曰。切望救爾靈魂。望爾獲安。望爾成聖。以享永福。致我如此之渴也。

至於聖心第四切望。更遠勝於他望者。即是光榮聖父也。其切望之言曰。我降來人世。爲燃愛主之聖火。我何所望。望此愛火。延燒熾盛而已。此係耶穌聖心之切望。此即衆聖所效之模範。此即焚燄衆心之大火也。

諸聖人赴聖體之神筵。無不迫切之至。如聖女加大理納瑟納。每見鐸德手捧聖體。即呼曰。求速賜我性命神糧。且聖人等。又無不

切願受苦。因知係能肖主之法也。聖安德肋宗徒。望見釘已之十字架。大聲歡呼曰。好十字架。我常盼望不止。到處尋覓者。今番遇爾。大滿我心之切望。可欽可敬哉。聖十字架。聖人等又專以天主光榮。爲己關心之事。忘己而求主榮。其口中常說者。多是如聖依納爵所常言。爲天主愈大光榮。至其迫切欲救人靈。甘受諸苦。見有爲救人靈。宜嘗之苦。宜受之勞。不但毫無退心。且效聖沙勿畧曰。再求苦些。求再苦些。或如近世一大德之人曰。噫。天主贖血所贖之靈魂。談笑而入地獄。如狂人之升塔尖。以自隕落。也可不傷哉。故除痛哭我罪之外。此係我第一之大苦。至若他苦。皆不足爲苦也。

噫。我輩離此慷慨之志。何其遠也。赴聖筵之望。何其微也。於昆弟

靈魂。天主光榮。何其漠不關心也。吁。耶穌聖心。爾何愛我之切。我何愛爾之疎也。求爾變化我心。此既係主之所能。求即致成於我。宜行之德。幫助耶穌救人靈魂。以解其聖心之渴。嗟乎。爾幸滿被聖寵神恩之富。乃同時有億萬之衆喪其靈魂。彼衆靈魂。皆耶穌寶血之價所贖者。爾竟漠然不顧。宜乎耶穌之怨爾也。主實待爾之求。以息其怒。如先知代主言曰。我怒欲滅世人。願有人爲衆求情。以息我怒。而竟無人焉。聞吾主愛情之怨言。爾能不動於心乎。故當恒替可憫之靈魂。懇切轉求。果能如此。則不覺之中。亦使多人回頭矣。吾主默示聖女德肋撒。因其祈求之故。化得印度千萬人奉教。即明驗也。

熱心短誦。吁。耶穌聖心之愛。恒燃不熄。求爾恒炙我心。聖奧斯定

第十四日。論耶穌聖心所求於人者何事。

勞厄曰。耶穌將其聖心。全賜於我輩。此係諸恩惠之根。諸寵愛之源。所命我輩以報其恩者。惟一物耳。即我輩之心也。吾主曾問聖女留加德云。汝求何事。聖女答曰。我所求所望者。惟主聖心也。吾主曰。我亦欲得爾之心而已。夫耶穌聖心。爲諸富之源。然而恒汲汲追逼。乞索吾人之心。如急需而不可須臾離者。豈非異事乎。耶穌聖心。果少急需之物乎。即少急需之物。人心之微賤。果能濟其急乎。我方寸之心內。有何珍貴之物。至令吾主愛而不捨乎。噫。我知之矣。夫心爲獻禮之首要。心在。則所獻之禮。始能悅主。吾主聖心。不看我所獻何物。惟看我以何心奉獻耳。且吾主愛我微賤之心。至切至急。至於吾心之一轉動。一仰聖之微。亦令主無任忻

悅。我輩一身所有。再無他物可比心。更屬於吾主者。因乃吾主戰勝所獲之物也。吾主如善戰之勇帥。惟人心能阻其獲勝成功。既得人心。則無他物可敵其銳矣。故吾主以降服人心爲榮。既獲人心。而作其主。則以此心爲其國。爲其天朝也。

聖伯爾納多曰。吾主之獲此天國。非易事也。不同有形之天地。一言而化成。必須殞命損軀。而後得。且耶穌臥於馬槽。以草爲褥。嗚聲哀切。所求者何事。欲得一心。以爲玩耍之物耳。後傳教如德亞國。周遊各處。耽盡艱辛。體億汗流。所覓者何物。欲得人心。而愛之耳。懸於十字架上。隱於聖體之中。所求者何事。近來又以其心。顯示於人。何所欲乎。欲覓人心而已。奈何無人肯獻己心。以滿其望也。吾主徧觀普世。徧視人心。億萬之多。各自愛其所好。幾無一心。

欲全依附其聖慈。此真可傷也。

救世者吾主耶穌。一日顯於聖婦安日辣曰。凡欲納我於己心者。我不惟不辭。且歡心就之。人求見我。我即忻然見之。人求與我言談。我即與之開心暢叙。因愛我者。最招我愛。若有愛我超於前聖者。則我賜彼之恩寵。亦必超於所載前聖之奇也。夫人不及前聖之愛。無辭可推也。人人皆能愛主。不必才能。不必康健。只要心肯。即可得之也。

吁。耶穌。爾雖是天地萬物大主。然又何貧窮孤獨。被棄之甚耶。多有爲爾設法生財。以濟貧窮者。我今亦欲爲爾尋得一物。以賜濟爾。即是化導一心以愛爾。爲爾之安居。吁。嗟。具有心肺之人。耶穌。欲得爾心。爾知之否。夫人心不能不有所歸也。因人生不能無所

愛亦不能不寄心於所愛者。今爾之心。既不能不以與人。不能無所歸附。何不歸附於耶穌。且爾心乃天主所造。則更有何人可比。天主耶穌。當占爾心乎。世俗得爾之心。欲變之爲地獄。耶穌得爾之心。今世即變之爲天堂。汝將何所擇乎。吁。吾主耶穌。我心既屬爾物。我今交還於爾。我又恨不能操衆心之權。使之盡歸附於爾也。若得如此。實我所願也。

宜行之德。 每年酌定一主日。每月酌定一日。專心致志。遵行避靜神功。以補爾靈魂之氣力。此乃救靈魂齊全自己。極妙之法。亦乃入居耶穌聖心。極穩之法也。聖經曰。我將攜彼善靈於靜密之處。與之談心焉。吁。此誠甘飴之優遊。能得無窮之妙趣者也。

熱心短誦。 吁。耶穌聖心。前者爾曾覓我。而我逃避。今者我

普覓爾。爾亦將厭我而逃乎。望不然也。

第十五日。論耶穌聖心廣招衆人。

聖經記耶穌招人至其前曰。爾等俱來我前。聖巴西略曰。甘哉主  
曹也。意若曰。爾等俱來。我也許爾之事。並無定數。我心乃慈善不  
竭之泉。可洗一切罪愆。爾等俱來。我將輕爾之任。慰爾心憂。爾有  
罪污。我能滅除。爾有瘡疾。我有妙藥。爾等俱來。我心廣大。可容衆  
人。我心慈愛。如大海無邊。可收一切罪人。消除其罪過。爾等俱來。  
此言可比無邊之大網。張於世海。以網羅諸人。盡收於內。  
爾等俱來。俱來聖心之內。年幼者可來。主心至慈。慈母愛子。不離  
比聖心愛爾之慈。年老者可來。主將復爾韶華英年。迅速若鷹揚。  
義人可來。隱於主心。能於德行之途。駸駸上達。罪人可來。主心慈

聖之恩波。洗爾罪污。夫罪人者。乃更多辜負聖佑者。乃更可哀憐。更動主慈。施以更寬之恩。以驗經所云。罪惡貫盈之處。主更充以慈恩者也。嗟乎。罪靈爾勞疲於罪惡之途。困於憂患之境。將失望而憂疑曰。天主已永遠棄我忘我矣。噫。勿驚慌也。爾可細聽吾主默示。聖婦安日辣之言曰。凡吾子女得罪。背棄我國。投爲魔鬼之奴。痛悔而復來歸者。必蒙收納。且因其來歸。我心甚樂。往往賞彼格外之恩。超過無罪之人也。爾知其故乎。一因天主憐愛罪人之情。實乃無限。一因罪人禍患之深。更動主慈。一因罪人之慘悔。自認得罪至尊至善之主。不應得主慈恩。理當受罰下地獄。而自謙也。爲此緣故。是以犯罪更多者。更得主憐愛也。爾聞此言。尙何憂疑。而不速歸乎。時。耶穌聖心。我何時方得隨爾仁慈之招。何時始

聽爾聖愛之聲。何時始愛爾耶。

聖奧斯定曰。人世之交。若能忠信。至死不變。且以爲友捐軀爲榮。可稱純全之交情矣。今吾主之聖心。爲我生時死時死後之忠友。因其以永福。酬愛己之人也。故爾當於衆友之中。擇吾主耶穌。爲爾第一忠友。爾到死日。世物皆要離爾。惟耶穌之聖心。決不失信於爾。雖世上至厚之友。亦將捨爾棄爾。惟吾主聖心。不忍棄爾。且爾臨終之際。與仇魔交戰時。惟耶穌必助爾。能救爾於地獄醜魔之強力。猙獰咆哮之獅口。不令其吞爾於斷息之時也。

宜行之德。勤救靈魂。最能安慰耶穌聖心之法。人人皆易取用之法。即是盡力救拔煉獄靈魂。凡望彌撒得大赦。代煉靈祈主。以及各樣微小之善工。爲煉靈而作者。皆屬救拔煉靈之善法。耶

耶穌甚願將己之功勞。合於此等善工。因吾主切望救拔煉靈。只礙於公義。似乎必待爾求之阻之。令緩其公義。而施仁慈於彼等也。  
熱心短誦。 吁。耶穌聖心。祈賜煉靈以永安。

第十六日。論如何入居耶穌聖心之內。

欲入耶穌聖心之內。第一。當有痛悔補贖之意。慟哭爾罪。以求赦宥。以謙悔之心。同聖多默宗徒叩拜曰。吾真主。吾恩主。我獨一之仰望。求爾容我。在爾聖心傷中。尋覓治我傷痛之方。又容我手。探爾肋傷之孔。不爲驗爾復活真否。特爲捫爾炎烈之聖心。炙熱我手。以之撫我冷心。變化歸於熱切。慘悔我之罪惡。痛恨我之無良。勉力以愛主也。吁。無限聖善之心。爾極愛明潔無疵之純淨。不容絲毫之玷污。求爾以聖畏之情。印刻我心。雖微小之罪愆。亦令我

深惡而痛絕之。吁。苦痛慘悔之聖心。爾代衆被擄者。出納贖罪之價。求爾賜我脫離罪惡之縲綬。改除習慣之毛病。剋制我之諸司。又以痛悔補贖。補償我所竊取爾之光榮。凡能如此謙遜祈求者。必能動聖心之憐憫也。夫吾人乃受造之微物。叛逆之虛無。有靈之糞土。恒造罪惡。輕主慢主。主尙容之俟之。今若定心改悔。一點真謙即可動主之慈。盡忘人無情無義之罪。此乃決無可疑者也。第二該存倚靠之心。信其必能將爾一切憂愁苦患俱沉沒於甘飴慈善之深淵。夫爾既係罪人。更當感發爾倚望聖心之情。因耶穌降世不爲義人。乃特爲罪人而來。故喜居於罪人之中。而稱爲罪人之友。接納罪人而抱持之。痛哭之。且謂天主天神。見一罪人悔罪。其喜勝於見九十九義人之無必悔者。故爾於顛仆之後。若

果發真誠望主之心，難言是何等榮主悅主也。耶穌親示於聖女日爾都德，以爲此等倚望，如快活之刃，以刺其心，不能不憐愛而助佑之也。耶穌曰：凡被誘感之攻，而堅心倚靠，求我助佑者，其招我寵愛，致我欣然自謂曰：我可愛者，純潔如鴿，獨一無二。誠選於千萬之中者也。嫣然一顧，遂奪我心。夫其爲我所愛如此，我若不得助之，則我聖心之苦，將令天國諸樂，亦不能慰我憂矣。所謂可愛者，以顧盼奪我之心，即其堅心靠我，毫不轉移之切望，確知我於諸事之上，皆能助之，且願助之也。此等倚望之強力，逼迫我慈，使我不能離棄其人也。

第三。當具靜默祈禱之德，以躲避俗務之煩囂。在此靜處，耶穌收爾於蔭庇之下，欣然就爾，與爾談心，亦如向聖女日爾都德之言。

曰。爾。目宜專注於我。爾靈諸司。當全用於我。以享吾聖愛之甘飴。耶穌聖心。招爾於僻靜之處。如當日招宗徒等曰。爾等來曠野靜處。稍息爾勞。是以汝當入於幽靜之處。遠離世俗之塵氛。亦如可愛之徒。倒憩於主懷。恬然安息也。噫。在此靜處。速能補得精神氣力。學得許多真實妙理焉。

宜行之德。良善心謙。耶穌聖訓曰。宜法于。子良善而心謙。汝聞此訓。不止千百次矣。恐爾尙未全明其義。故當求主。賜爾明之。謙良二德。乃吾主自聖心中。特意提出以訓我人者。我等若不立志。勉學此德。而實踐於行。則不得爲耶穌之真徒。亦不得爲熱心敬禮聖心之人。因聖奧斯定曰。敬德之歸結。在法其所敬者是也。熱心短誦。吁。耶穌聖心之愛。知爾愛爾者。何其少也。求爾

開明人心。使皆知爾愛爾。

第十七日。論人靈不拘何處境遇。耶穌聖心。恒乃良方。

耶穌聖心。乃充盈之府庫。上智之深淵。於此深淵內。可得治爾靈魂一切病症之良方。然此聖心。更爲聖愛之淵。一切諸愛。皆宜歸於此淵。而自私之偏愛。更宜沉溺於此淵。蓋私愛發生無數之惡苗。如順從俗人情面。貪高位。愛歡娛。皆是也。在此聖愛深淵明鏡中。照見爾一切偏僻。庶幾依爾所在之地步。可得一切急需之聖佑也。

聖瑪爾加理大曰。若爾落於枯乾無味。懈怠無力之淵。可急入於吾主聖心之淵。此乃德能熱切之淵也。然不必急急求聖愛之濃味。任其何時賜爾可也。若爾輾轉於窘困憂患之淵。則聖心爲全

能神慰之淵。爾可入於聖心。自可解也。若落於窮乏之淵。赤貧如洗。可投入耶穌聖心。彼乃珍寶之洪海。任其隨意安置爾事。必將富足爾靈也。若爾陷於軟弱。顛仆於舊罪之淵。可投入耶穌聖心。彼乃仁慈德能之深淵。必然提拔爾。堅固爾也。若覺得自尊自重之傲念。據占爾心。當速投入耶穌聖心。因耶穌聖心。乃謙德之深淵。最能沉沒傲念也。若爾落於昏愚暗冥之深淵。耶穌聖心。爲上智光明之深淵。當投入於彼。求能愛主。求能翕合主旨之寔學。而別無他望焉。若爾落於不忠不恆之淵。耶穌聖心。乃恆久忠信之深淵。可投於彼。必得恆心之愛德。以愛同人。施之以恩也。爾若落於死亡之淵。投入耶穌聖心之內。即得生活之淵。且此生活乃一新生。以耶穌之目而視。以耶穌之口舌而言。以耶穌之行而行。以

耶穌之心爲心也。爾若落於驚慌恐懼之淵。耶穌聖心乃倚望聖愛之深淵。可投奔聖心。則知聖愛能除驚懼也。未復囑爾時時事處處。皆當置爾於此聖愛之火海。若不得聖心愛主愛人之火。炙熱爾心。則永勿出也。

宜行之德。堅望。爾之偏向雖猛。爾之罪過雖大。亦不可灰心喪志。當思有耶穌聖心之功勞。隨意可用。以補爾缺。不拘何等罪大惡極之人。耶穌聖心皆肯收納。爾當投奔於彼。而向之曰。吁。吾主耶穌。我於罪惡之淵。呼爾仁慈之淵。大洋之水。滅一星之火。其速其易。未若吾主聖心之慈。除滅爾罪之速也。

熱心短誦。吁。耶穌聖心。爾乃我諸難中之倚望。

第十八日。論耶穌聖心在山園憂悶至死。

耶穌預知爲人類將受之苦。此預知之苦。誠可謂一生恒負之十字架。不斷之致命。而山園祈禱之時。將一切應受諸苦。盡擺列於明悟。全聚於聖心中。以負其重。以嘗其苦。乃其更苦更痛之時也。熱切恭敬聖心者。每日當於此處。默想吾主聖心之愛。而衡量其廣大。吾主在山園時。乃其聖心臨終致命之刻也。受難時。聖身所受有形之苦。藉以遂愛其人之情。猶似輕其內苦。在山園所受之苦。乃無聊無慰之極苦。凡可輕其苦痛之念。一概拒絕而不納。聖詠所謂我靈憂甚。不受勸慰是也。試思吾主於此慘苦之臨終。所受者係何等之苦。其聖心第一大苦。是痛惜其聖父也。天主聖父極愛世人。致將其最心愛之聖子。賜於吾人。且付之於極慘極痛之死。以救犯罪之人。如此驚動神聖之奇愛。何人曾細想乎。何人

曾盡力圖報乎。

世之爲父者。無可比天主聖父之其愛聖子者。亦無爲子者。而其愛父之心。如聖子之愛其聖父者。故耶穌在山園憂悶至死之頃。極痛聖父難明之至愛。被人之無情無義所辱。且以無數罪惡。酬報聖父無限之愛。此實耶穌聖心第一大苦也。其聖心第二大苦。是憐憫聖母之苦痛也。耶穌受難時。凡其所受之苦刑侮辱。聖母皆受之於心。經云。聖子懸於架。痛苦之母。兩眼淚流。依依立於架旁。何其悲也。人之常情。凡見所愛者。痛楚悲傷。且知因己而傷。則己心之痛。慘於致命矣。聖子臨終之頃。明知聖母不可名言之痛苦。遂以相憐之情。將其苦加於己苦之上。收而納之於心。以全受之。其苦爲何如也。爾今細思吾主爲爾所受之苦。如許重多。求主

將其聖心苦海之一滴。注於爾心。使爾嘗得吾主之苦。爲何如。亦當爲主承受一切諸苦。勇作一切善功。以報主如此之大愛也。

宜行之德。耶穌與聖瑪爾加理大。所定恭敬聖心之工內。今有所稱爲聖晷之工課者。主語之曰。我願爾於每瞻禮五入瞻禮六之夜間。從子初至子正。俱作默想工夫。與我分受山園祈禱時之憂悶。以息我相反罪人之義怒。以稍輕我彼時被捨棄之苦。其苦令我實不能忍。故責我徒曰。竟弗克同子寤半晷乎。耶穌顯示之言如此。爾若年老。或患病。或長上不准。不能遵行此極有大益之工課。然能發一欲行之願。即是每瞻禮五晚間。將衆熱心行此工者之默禱。獻於天主。以補爾不能遵行之缺。又求護守天神。在耶穌聖心之前。代爾祈禱。此等之願。爾不能推辭不能發也。

熱心短誦。吁。耶穌聖心。因我罪人。山園滿其憂悶。

第十九日。仍論耶穌聖心山園憂苦。

聖女瑪爾加理大。一日默想耶穌在山園臨終之憂悶。耶穌顯現謂之曰。我在山園。心中所受之內苦。遠勝於我受難時。一切之痛苦。視我爲天上地下之所棄。止我一人。全擔普世衆人之罪。現於吾聖父純聖之前。聖父之公義。微罪必罰。不看顧我之無罪。將其聖怒。全洩於我。一身。而挫折我。令我盡飲苦膽之爵。以補償其公義。似忘其慈父之名。必欲置我於死。以息其怒。嗟呼。一切受造之物。皆不能明我。此時爲人類所受之慘痛也。

故耶穌聖心。第三大苦。是自憐自悲之苦也。夫苦之未至。而焦愁恐懼以俟之。其情更慘於實受。故耶穌在山園之際。許受難時所

受之苦。一齊先到其心。所有羞辱痛苦之情景。盡列於明司之中。亦似欲於聖身未受之前。先以聖心細嘗其痛苦之滋味也。凡釘鎖十字。鞭笞醋膽。唾面掌嘴。敝袍茨冠。戲侮之權杖。仇人之賤辱。親人之捨棄。茹達斯之負賣。伯多祿之背棄。耶穌於山園。皆預先見之。而預先安心受之矣。

聖心第四大苦。是憐憫人類之苦。耶穌極愛人類。聖婦安日辣曰。吾主總憂人類之喪亡。猶爲未足。更分而一一憐憫之。不惟總痛衆人之罪。且分而一一痛哭之。每人已犯將犯之罪。大罪小罪。各依其輕重。俱崩裂吾主之聖心也。我輩不拘係何等人。或爲義人。或爲罪人。各以其苦患之分。積累於吾主慈憫之心中。令吾主憂悶。欲絕是也。故欲明吾主將終之聖心。所受怖怯憂鬱之大。當細

算已往將來。以至世終之人數。及其罪惡苦患。衆多且大之數。再細衡量聖心。憐愛人靈之熱切。及其盡救普衆靈魂。肉身之切望。始可知其梗概也。

諸如此等。不可言傳之苦。四面圍攻耶穌之聖心。致令其肝腸寸裂。爾不聞耶穌呼歎之言乎。曰。吾靈憂甚至死。父。爾能全。倘可免。予飲斯爵。請諾。又不見耶穌被棄於聖父。怖怯憂鬱。至於此極。於未受刑役之釘茨鞭笞。先因憂愛二情之猛。已令其血汗遍體。流注至地乎。何故如此。無他。因耶穌聖心。此處所受之苦。已毫不亞於十字架。上所受之苦也。又欲爲一切遭憂患者。親身立表。作其投奔之所。作其安慰也。噫嘻。信友當日如德義人。見耶穌泣於辣匝祿之墓前。共相訝曰。其愛彼竟如斯乎。爾今不惟見主涕零滿

面。且見血汗遍體。以顯其愛爾。爾又何以爲言。何以爲情乎。爾可到臨終救世主之前。以爾之苦。比較其苦。若不敢生此妄念。當求天主聖父。不棄爾之微賤。許爾代天神之位。寬慰耶穌。陪之伴之。與之同寤同禱。如耶穌所囑曰。爾輩坐茲。同予寤禱。而耶穌憂悶之心。所望於爾之一點安慰。即是欲爾在苦患之中。以忍耐安心順受是也。

宜行之德。爾凡預備神工時。宜懇求耶穌聖心。收納爾心於彼心內。以分其痛哭爾罪之苦。因爾所犯罪惡。都是耶穌山園祈禱時。置於目前。而深痛哭者也。

熱心短誦。 吁。耶穌。以爾刺心之痛。穿透我心。以悔我罪。  
第二十日。論熱愛聖心者。俱樂部想耶穌苦難。

耶穌愛人之烈焰。及其難以言傳之痛苦。沉其心於苦海之中。其切望救人靈魂之焦渴。以及天主愛人一切之奇蹟。若非救世主。親示以可捫可探之實據。誰能想及其事。又誰能深究確信哉。夫爲友赴難捐軀。乃真愛極大之確據。經曰。爲友失命。未有大於此愛者。而耶穌聖心。以此憑據。已施於我輩矣。然此言尙不足以盡之。耶穌非止爲友失命。且爲殺己之仇。而失命矣。聖奧斯定曰。吾主若不愛仇。我輩中誰復可蒙其愛乎。我輩犯罪時。爲主之仇。主乃愛我。而欲使我可稱爲其友。吾主爲我所受之苦難。及其聖死。乃其至愛之明徵。吾主欲我永不忘此遺念。故每日於彌撒大祭中。仍欲復新遺念也。熱愛聖心者。不能不樂想此難明之妙法。可欽可感之遺念。此乃耶穌聖心。因其大愛。設出之法。以徵其愛於

極頑梗之人心也。

熱愛恭敬聖心者。不止該陪伴耶穌於山園之中。亦當追隨於兵卒之間。隨之於京都街衢。隨之於亞納。蓋法。比辣多。黑德落之衙署。隨之於鞭笞石柱之下。隨之於加爾瓦畧山。直至斷息而崩。與之相依而不離可也。

至於默想耶穌苦難之功勞益處。衆聖人無不同口讚揚。聖奧斯定曰。記憶主苦。流一滴淚。勝於親往日路撒冷。朝拜聖地。勝於整年清水乾糧之素齋是也。聖理額畧曰。爲何愛主之人。很少乎。因默想吾主爲人受難者。甚是稀少故也。常想主苦者。被其聖愛催逼。不得不愛如此愛人之天主也。耶穌所以受如許之大苦者。無非欲人愛之也。吾主親示於修女物落尼加云。我切望人人皆以

眞痛之心。及憐憫我苦之心。恭敬我之苦難。人若因此流一滴淚。即可自信其所作不少矣。蓋人之口舌。難以講明此一滴淚。如何慰我之深也。曾有天神。示於眞福者十字若望云。天主之尊。見人默想主苦而流淚。極樂其心。痛哭耶穌之苦。極悅其目。其看重此淚。如人爲彼致命而流血。或受極大之酷刑者同。

一日耶穌向聖婦安日辣云。凡欲得聖寵者。不拘處何境遇。或憂或喜。不可一時不注目於我十字架。凡用心默想我之苦難。聖死者。乃我真子女也。其餘爲我子女者。皆有名無實者也。

宜行之德。按聖教所傳述。耶穌升天後。聖母每日往朝聖子。聖血所染之處。宗徒等亦效其表。迨後來之信友。無不勤於遊歷苦路者。今聖路善工之立。特爲滿不能親朝聖地者之願也。教

宗等頒賜許多恩赦。爾當勤行聖路善工。而於聖教會。勸人記憶耶穌苦難之期。更當勤於遵行。

熱心短誦。我永不忘吾主之苦。我靈將以驚訝懷感之切。至於疲憊焉。古經

第二十一日。論人心之薄情。

自建定聖體大禮以來。耶穌聖心。雖不受他傷。而所受世人無情無義之侮辱。苦已甚矣。無數如德義之人。無數異教之人。及不信天主之人。常辱耶穌。而傷其聖心。至今千有餘年。以至世末而後已。所受之辱。有難設想者矣。更可傷者。即是名爲教友。而亦如此辱主者也。經曰。物爾朋己居吾內。蓋耶穌不但欲居於人間。且欲居於人心。其不可名言之聖愛。竟致親口自言曰。予之欣樂。在乎

與人交遊。此愛之大。尚可限量乎。噫。吾主爾在此無良罪人中。受得何樣接待乎。爾不惜尊貴。屈居於彼中。彼乃爲爾不肯預備一合式之居處。彼自居者。多是高樓廣廈。却置爾於茅菴草舍之中。昔達味聖王。含悲向納丹先知曰。汝不見我居於桂殿蘭宮。而主之結約聖櫃。乃在幔幕之中乎。夫古教結約之櫃。不過聖體之預像耳。而耶穌聖體。乃真新約之櫃也。悲哉吾主耶穌。今人多處於豪華富麗之中。誰更念爾在聖堂之寂寞乎。若爾於有形之堂。雖不得鋪陳華麗之美。或於人心之中。得其慇懃款待。猶可以自慰也。誰知亦不得如是。爾晝夜獨處於聖臺之上。招請等候人來。而晝夜循環。日復一日。竟不見一人到堂望看。即有來者。亦不過了草塞責。盡其虛文故事。身雖在爾之前。心却離爾甚遠也。爾在聖體

密蹟之內。時時想念吾人。時時在聖父台前。作爲犧牲。爲吾人祭獻爾之苦難。而人在爾前。並無欽敬之意。甚至跪立不端。且令異教之人。雖不信爾。真在聖體中者。亦譏誚其怠慢。彌撒中。鐸德送聖體時。耶穌自呈自獻。以甘飴之言。招請人曰。吾衆愛友。來食且飲。以我豐宴。酣暢爾輩。食吾豐饌。飲我醇酒。而人聞此語。皆退縮不前。一如無傷可瘡。無垢可除。不屑赴其神筵。辭以別有招請者。別有好友當交也。吁。慈善慷慨。愛我之耶穌。我輩傷爾聖心。還有更慘於此者乎。乃我似聞主聲曰。我切望我所愛之人。或有來憫我痛者。而竟未得其人。望有來慰我憂者。而竟無人肯來也。

宜行之德。爾靈乃天主所選之城池。其恩惠之多。如不盡之長江。環繞而澆灌之。在世之時。爾所能知者。不過萬中之一耳。

夫感恩報德。既係熱愛聖心之一大記號。爾當每日。感謝所受於主之恩。即他人生活於主恩。而不知感。且以其恩而得罪天主者。爾亦當代爲感謝。蓋知恩報本。乃承新恩之善法。辜恩負義。乃杜塞恩惠源泉之由也。

熱心短誦。我何以謝主恩乎。我惟獻其聖子耶穌之心於彼。庶可以酌其恩愛也。

第二十二日。論耶穌聖心之怨嘆。

我輩可細聽。耶穌聖心怨歎於我輩之言。夫此怨歎。又係愛我之確據。若不愛我輩。又何屑向我輩怨歎哉。且耶穌之愛我輩。全爲我輩之利益。非爲己私也。我輩之或升或墜。豈能增減主福之毫末哉。主怨於吾人曰。我之信衆。我爲爾所宜行者。更有何事未行。

乎。我何處曾苦虐爾乎。可爲我言之。萬民之衆。我皆任其坐於幽冥之中。沉淪於永死之幽谷。特選爾曹。使得信德無價之寶。爾却埋沒此寶。於爾忽畧怠慢之心中。不令其茁秀成實。爾乃我親手所栽之葡萄林。原望爾結佳實。爾所結者。惟苦口之野果。因我渴時。爾乃飲我以醋也。又以爾之負恩冷情傷我。更勝於利戟穿我之肋也。我爲爾流盡我血。一滴不遺。爾如何視之乎。曾以我血。得何益乎。我招爾同享吾國。同分吾產。爾乃使我手執竹竿。以當權杖。頭戴茨籬。以當冕旒。即是以爾懦弱無恒。或傲滿誇大。得罪於我也。我結合人性。高舉爾得分天主之性。爾以爾罪。高懸我於十字架上。我養育爾。不以瑪納。因爾先祖雖食瑪納。仍皆死亡。我乃以自天降來之神糧。自含永生之飴味。養爾飼爾。爾乃將此天神

共驚之奇恩。背而不信。甘爲異教之徒。離析我寓義之身。裂壞我至一之聖教會也。嗟乎。通衢過路之衆。試留神細看。曾有痛苦。如我聖心。受人如此負情之痛苦者乎。

救世主。又曾親發怨歎之言。於其忠信之婢瑪爾加理大。開胸露其聖心曰。此即我愛人至極之心也。爲愛世人。萬苦不辭。以至流盡聖血。喪我生命。然而多人。不惟不感我恩。反於我聖愛密蹟之中。侮辱我。輕慢我。冒領我之聖體。或冷心以領。然我更難忍受者。是名爲獻心於我之人。亦多如此辱慢也。又一次。開胸示其聖心。徧處所受傷痕。曰。此皆被我所簡選者。所刺之傷也。他人惟擊吾身。彼則刺我之心。然此心仍不斷愛彼也。嗟乎。此等無情之人。非我輩乎。耶穌所責怨者。非即我輩乎。我輩以聖洗。應募爲耶穌之

兵屢食其聖體之糧餉。或亦曾入某會。誓敬聖心。以洗聖心之侮辱。爲己職。而竟如此冷淡。如此怠忽於其聖心。宜乎吾主借違味之口。而責我曰。設使吾仇。如此待我。猶可忍也。今乃係我所愛之密友子女。輕我棄我。我何以堪其苦乎。吾主又曰。我之聖心。在聖體密蹟內。亦可如在十字架時。自歎爲一切羞辱。苦痛之所集。被遺被棄。毫無安慰。只有轉心向爾。與幾個熱心善靈。望得些須安慰。望以爾等之敬頌愛慕。償其所受之侮慢凌辱。噫。滿望我等今日。傾聽吾主怨歎之聲。不忍狠心塞耳不聞也。噫。若得吾主聖心簡選我輩。爲其忠徒。於無數負恩之人。遺之棄之之際。代償其缺。而慰主心。豈非我等之大榮大福哉。故當於欽敬吾主聖心之功。加倍慇懃。仗其聖佑之幫助。誓不離棄吾主可也。

宜行之德。惟此默想之功。能使爾知吾主聖心。愛爾至於何極。及爾之負恩。至於何極也。知此兩端。自能生出悔恨愛慕之情。且能加爾志氣。爲主勇於行善。故不可一日不作默想。至少一刻工夫。

熱心短誦。吁。耶穌聖心。求爾顯大靈奇。令我至極辜恩負義之心。變爲聖愛極熱之心。

### 第二十三日。論恭敬聖心。宜行之工。

吾人一生在世。天主看聖子之功勞聖血。常施聖寵。使我等可得永遠無窮之珍寶。可嘆吾人。每日因疎忽之故。失却許多珍寶。以致百行之中。大半因無純淨爲頭。失其貴重。故我等宜勉力。脫離此沉迷昏昧之地步。欲得百行有功。而極光榮天主。當用波羅削賢

人所教之法。即是每日將爾善工百行。獻於極甘極聖吾主耶穌之心。求其煉之潔之。因其愛爾至極。常願將爾之善行。刮磨極淨。使能相稱。獻於彼也。有問於可敬之瑪爾加理大者。彼亦以此法答之。曰。若爾自恨奉事天主之懈怠。不能勇往直前。今有一法。似乎來自天主。可依而行。即是將爾所作所爲。皆相合於耶穌聖心。以爲起行之預備。以爲收結之補贖。比如爾在默想中。不能想得什麼。可將耶穌在聖體密蹟中。爲我輩所作之熱切默禱。獻於天主。聖父。以補爾之冷淡。每行一事。即向主曰。我之天主。我願在爾聖子聖心之中。隨其爲頭終向。行此事。忍此苦。並獻其終向於爾。以補我爲頭不純全之處。總而言之。爾有所缺。可愛之聖心。皆代爾補足。因聖心代爾愛主。爾之愛主。亦當靠聖心。用聖心以愛之。

也。昔聖女熱而都德。一日祈禱。用心預備。以望善行其工。然因人性之軟弱。竟不免許多分心。聖女憂苦至極。乃自謂曰。如此心紛意亂之祈禱。有何益哉。吾主欲安慰之。遂以聖心與之。曰。我心乃天主聖三之樂。今賜與爾。用補爾缺。爾當堅心倚靠。將爾諸行。全放在此心內。必能成全爾行。使悅我目。且自今以後。我之聖心。任爾使用。時時可以代補爾缺也。汝當善用此端聖訓。以收神益。比如爾愛何物。或誦何經。或服何勞。或忍何苦。俱當合於耶穌聖心之情之求。聖心之勞之苦。以愛以求。以勞以忍也。更有進焉者。爾若偶犯過失。於謙卑痛悔之後。即奔入耶穌聖心。覓取相反之德。以敵爾之偏僻。如謙遜愛德。安心忍耐。恕人過失等德。獻於天主聖父。以贖爾罪。此乃欠債即還。簡便之法。且係趁得無數功勞之

妙法也。聖女瑪爾加理大常用此法。爾每落於罪過。即當效之。誠實奔赴聖心前曰。主。爾親見我所犯之罪。求爾代我貧乏罪人。補償其失。且於每日晚間。將一日諸行。皆置於吾主聖心之中。求其補足。浣潔諸污。諸缺焉。

熱心短誦。吁。耶穌。爾之聖心。既賜於我。望其鑒觀護衛我。於寤寐之際。

第二十四日。論諸聖人之熱愛耶穌聖心。

人雖至貧。莫不有託身之地。耶穌所謂飛鳥有巢。狐亦有穴是也。我奉教人。可獨無安居之宅。甘爲世間逃竄之人乎。耶穌聖心。實乃安美之居。遠勝人間帝王之宮殿。不擇吾主聖心以居。又將何擇哉。聖人等深明此意。故皆樂選耶穌聖心。以爲安宅。聖伯爾納

多言及刺開耶穌聖肋之戟。似有嫉妒此戟之意。曰。設使我爲此戟。一入吾主聖心。誓不肯出矣。聖爾瑟亞諸侯。寄書與童貞之妻。聖女德而斐納云。爾何時欲與我聚會。可於吾主聖肋中尋覓。此乃我常居之處也。耶斯博云。汝該習學。常居聖傷之內。飢則有自天而降之瑪納。渴則有自天而降之活泉。流溢於衆信友之心者也。且亦勿慮見棄不准。蓋天主聖子。權愛敬己之人。無以加尙。其招請之懇懃。欲人人皆如聖若望宗徒。倒憇其懷。暢飲於甘泉。以解其渴也。聖伯爾納多云。我等齊赴耶穌之前。記憶其聖心。而踴躍歡忻可也。吁。居此聖心。何其樂也。即同達味聖王曰。我將詣主聖殿。於此至聖之所。結約聖櫃之前。頌主聖名。我今求得一心。用之祈禱於天主。此心即我王我兄。我至密之友。耶穌之聖心也。吁。

甘飴之耶穌。我既覓得爾心。是亦我之心也。我即於斯。欽崇朝拜爾焉。求爾在此寬宥之殿中。納我所求。更求爾收藏我於心中也。吁。耶穌。萬美之美。可愛中之可愛。遠勝世間一切可羨之美麗。求爾多洗我於逆行。而潔清我罪逆。使我能近爾。恒居於爾聖心。爾之聖心。被刺大開。正爲與我開一投奔之處。爾心大開。實令我輩脫離俗囂。得安處於其中也。誰不愛如此被傷之心哉。誰不愛如此愛我之心哉。聖方濟各撒肋爵在世時。亦以耶穌之聖心爲居處。雖事務紛紜。不能擾其所禱之靜。至若欲全摘聖女熱而都德及聖女默弟而德。講論聖心之言。幾宜盡錄其傳矣。尙有許多別位聖人。於耶穌顯示聖心之前。早已格外熱切恭敬吾主可愛之聖心。難以盡數也。

宜行之德。爾雖不能如傳教者。徧處宣揚吾主耶穌。至少能勸熟識之親友。使愛耶穌。此即爾傳教之處。而更當善訓家下人等。因天主後日。必以其靈魂。索問於汝也。如此傳教。雖無榮顯之名。而功勞却不小也。

熱心短誦。噫。天上真福。諸聖。爾等明見耶穌聖心。愛之而無間。又無失之之可慮。求爲轉祈天主。賜我亦如爾等。認之愛之。自今至於無窮之世。

### 第二十五日。論耶穌聖心像。

人愛其好友。若遠離而不得見。則觀其圖像。聊以自慰。佩其像於身。而屢親之視之。此人情也。熱心之郎斯博。勸我等恭敬耶穌聖心之像。亦當如此而行。曰。欲保存爾之熱心。當求得耶穌聖心像。

一幅懸於敝處。以便時時瞻仰。感發熱愛之情。亦屢口親聖像。如得親耶穌聖心。一般熱切。神思中。可進居此天主聖性之心。以爾心貼合彼心。以爾靈魂。置於其內。切望融化於其中。吸取聖心之神。沾其恩。沐其德。總之。宜令吾主聖心中。所存無量之恩。皆貫通於爾心。因吾主聖心。乃萬善之源也。况聖教有訓我恭敬聖像之端。上文所說之法。大有神益。亦深合聖教會所訓之端。昔聖女德肋撒。曾謙樸自言曰。我之明悟昏劣。難於擬想無形之事。故我極愛聖像。如俗人喜觀所愛者之圖像也。惜乎多有不欲用此法。而失無窮之益者。亦足見其無愛耶穌之心矣。果有愛主之心。安能不以視主之像爲欣悅哉。人若果知此舉。如何悅樂耶穌。則不能不感發於心。而熱切恭敬耶穌聖心之像矣。瑪爾加理大親述之。

事。可爲據焉。聖女曰。我於若望宗徒瞻禮日。領聖體後。得見吾主聖心。安於烈火之座。輝耀四射。光逾太陽。其在十字架時。聖心被鐵鎗穿破之傷痕。宛然可見。心旁有茨冠圍繞。上有十字。吾主示我曰。受難諸具。表我心中愛人無限之愛。此愛即我諸般痛苦之由也。受難時一切刑具侮辱。於我降孕之初刻。已全現於我明司之中。苦十字架。已豎立於我心中。已預知我人性。將受之一切苦痛屈辱。並日後在聖體密蹟內。與人同居。所受之侮辱欺凌。我皆情願領受於吾心矣。修女又曰。耶穌最喜人。借火焰四射。茨冠圍繞。上具十字之聖心像。以敬其聖心內之聖情聖愛。願人遵照此形。繪畫爲像。懸於公處。以感動頑梗者之心。並許下將己聖心內。聖寵之寶藏。厚施於恭敬聖心聖像者。不拘何處。有懸此像。而格

外敬禮者。即蒙各種之降福也。我等可常佩帶耶穌聖心之像於胸前。凡誘感來攻。即毅然向魔叱曰。耶穌聖心同我在此。醜魔速退。宜行之德。常佩耶穌聖心聖牌。或聖像於身。誦經之處。亦宜懸掛此像。虔敬耶穌聖心。

熱心短誦。耶穌聖心。爲恭敬者之靈佑。求賜愛天主之愛以熱我心。

第二十六日。論何者阻人。不得恭敬聖心之大益。

細察阻人熱愛耶穌聖心之故有四。第一阻當。即是怠惰。此乃最可憂之地步。怠惰之人。惟勉強行其所不得行之工。而毫無愛德。毫無熱切。自己亦成自己之重任。於修德之途。不惟不進。且日退於後。凡人於每日神工事。漸漸習爲俗套者。不久必將沉其靈

魂之舟。此等人。行神工之事。全無誠敬。專一。熱切之情。深宜自懼。若不以信德之心。熱愛之情。勉勵警醒自己。難免於禍矣。吾主耶穌在默照經書內。有言曰。因爾不冷不熱。我將吐棄爾矣。其意若曰。爾不稱生活於我內。亦不稱入居我心。因爾恒以冷淡之情。報答我之熱愛。辨告解。而不改過。領聖體。而無所益。皆此怠惰之所致也。

第二阻擋。是自愛之私。夫聖經之訓。總括於棄絕自己。每日背負其十字。兩句而已。然此正多人。不肯細思之端也。即有意修德者。亦只修其性情所好之德耳。如此之心。安能與吾主聖心相合耶。吾主聖心。全付與人。一毫不留爲己用。故其所求者。亦係慷慨勇敢之心。不畏前進。不懼深入。惟知向前。而不後退。並不知自私自

吝者之心也。

第三阻擋。是所有爲首之毛病。而姑息不肯勇克者也。人雖盡改其毛病。若爲首者不改。則與吾主聖心。必不能相合。故當認真細察。還有何樣姑息之毛病。察出之後。即當慷慨獻於吾主聖心。奮勇克除。當知半割不斷之苦。更勝於一刀兩斷之難也。

第四阻擋。即是隱傲。隱傲之情。每因修德而彼愈猛。修德路上。無有比此毛病。更能阻人前進。能由德行之高位。推人落於怠惰之地步。且陷人於大罪之中。從此隱傲。生弊多端。自喜自大。輕慢他人。與人不和。嫉妬他人之善。設法褒貶。恒求榮顯於人前。所行善功。如克苦哀矜。講道勸人。誦經默想。皆欲人人知道。讚爲有德熱心者。且託詞爲樹立善表。以飾其隱傲。尙自信爲有德之人。其實

所有者。不過皮殼而已。因其隱傲。將其善功。盡化爲烏有。所謂蛀虫雖小。蠹壤參天之木是也。歷來多少鴻名博學之士。背棄真道。而成異端之魁。禍及聖教而不止者。皆由於此也。可不戒哉。况耶穌聖心。極謙遜。如此傲心之人。何能與之相合哉。故此病又一最大之阻也。

宜行之德。爾若願得敬愛耶穌聖心之真熱心。必須嚴自省察。果有上文所言。宜除之阻礙否。最善之法。即是每日不缺省察工夫。欲妥行省察。當謹遵五條。一先謝天主所賜諸恩。二伏祈天主使認爾罪。而痛恨之。三嚴求諸己。所思所言所行。每時每刻。有何過失。四祈求天主。凡有所犯罪過。一切赦之。五誦天主經一遍。或隨意選誦某經。以收結之。

熱心短誦。吁。耶穌聖心。求爾賜我謙遜熱切之心。

第二十七日。論克苦以除恭敬聖心之阻。

爾既察出。何者阻爾熱愛耶穌聖心。即當勇敢修內外克苦之德。以勝之。此兩樣克苦。於修德乃最緊要之端。而內克苦更爲緊要。無人可免。此即奪取天國之強力也。每日之中。若不千次百次。狠攻己之偏向私愛。決不能久活於信德之生命。因人在世之本分。愛與恨而已。即是以全心之愛愛主。以有益之恨恨己是也。

欲作恨己之行。時刻皆有機會。無人不得。或克己之本性。或克己之偏向。如動怒而欲爭之際。或逞能而欲言之時。皆能默而不言也。所云內克苦。正在此等事上用工夫。以此克苦。將自愛之私。挫之抑之。伏於正理之下。始能漸至齊全之地步。我輩若無此克苦。

慎勿以能愛主。自信自欺可也。因一切熱心之工課。美妙之善情。離此克苦。皆屬可疑。有向聖依納爵。稱述某人如聖者。答曰。若真係自克者。則誠爲聖矣。其意正謂此也。夫一時一事之克己。猶爲不足。必須時時事事。隨智德之所指。常行自克。蓋本性之私欲。雖百次勝之。未必即伏。而一次放縱。即大加其猛力也。凡真心切望修德齊全自己者。莫不習用此克苦之工夫。亦無處不逢克己之機會。故一覺縱目欲觀。開口欲言之誘。彼即低頭下視。捫舌不言。或好打探新聞。查究過往何人。所言何事等情。皆爲彼等時時克己之機會。宜如此克苦乃平常之德。人雖不覺。而天主獨知。功勞更大。如一句話說得對境。一戲言用得巧妙。人前自覺光彩。彼則捨而不發。皆成爲獻主最馨香之祭品。再如正有緊要忙迫之事。

而旁人百次來擾。彼亦百次謙和忍耐。以接待之。一如閒暇無事者。至於居處之不便。氣候之寒暑。同侶之偏僻。皆克苦之機。能致大功。且豐厚之恩佑。崇高之聖德。多係於在此等煩瑣微小之機會。勇敢自克。而德行之真偽。亦於此見焉。

克己雖苦。然並非一生。全在愁苦之中度日。毫無權樂之時也。因吾主之軛。原本甘飴。輕而易負。聖人等每用聖保祿宗徒之言。歡呼曰。吾處憂患之中。無任忻慰歡悅之至。豈自欺哉。聖沙勿畧致書於羅瑪之會友曰。吾所居之地。雖應用之物。一概全無。然自覺心內樂莫大焉。難禁喜淚之流。恐傷吾目是也。請問世俗之人。雖處於極樂之中。能有此快心之言乎。汝畧奮勇向前。則知所難者。不過第一步耳。有一善事天主之人曾云。設有半月之久。果真自

克而尙不得嘗前聖所嘗之甘飴者。我便依其所言。謂真心愛主。係愁苦之事。耶穌之軛。重而難負。然此必無之事也。倘若爾實覺克己之難。奔赴耶穌聖心。亦皆渙然冰釋矣。聖女瑪爾加理大。一日自覺事逆心性。難勝其阻。不能決意聽命。吾主責其懦弱。不能爲愛主勇於自克。聖女訴曰。我之本意強勝於我。我奈何哉。主曰。可將爾本意。置於我聖心傷中。必能勇力自克矣。聖女感切曰。嗟我之天主。求將我之私意。深深藏於爾聖心中。閉之於內。令其永不能出可也。

宜行之德。公省察之外。宜加私省察工夫。專察爲首之毛病。或願修之某德。行法如下。一清晨即將日中當行當克之端。定一堅固之志。二午時細察相反志向之過失。三晚間照前細察。欲

得功效。全在清晨之志。懇切省察。細心搜尋。日中時時留神於己身。熱心祈求聖佑幫助。清算缺失之多寡。以定日進之遠近。聖依納爵回頭之後。遵行此工。精細之至。大聖大賢。如此細察已失。不以爲過餘。我輩凡人。豈可以其事爲瑣碎。而不肯行哉。

熱心短誦。 吁。耶穌聖心。求賜我克苦之德。

第二十八日。論欲得敬愛耶穌聖心之熱心。第一法是善求。欲得愛慕耶穌。及敬禮聖心之熱切。第一法是祈求。各羅塞曰。可怪哉。信友之懶惰也。現有最穩最便之法。可賴以成一切所願之事。其法即是求主。而乃尙不肯用。豈非可怪乎。耶穌訓我等之事多矣。然從未有如新許聽納我求之言。更爲頻數顯切者。主曰。爾求則受。爾尋則得。爾叩門則開。至今爾輩。未倚予名以求。求則受。

爾樂則滿。又曰。爾有所願。則求之。求則得也。天主欲脫人於喪亡之深淵。天主聖神。先默啟人。使知所求。此所求。即回頭之第一憑據也。主遣亞納尼亞。往視掃祿。亞納尼亞畏不敢往。吾主使知。掃祿已非謀害聖教之人。心已被化而爲信友矣。乃與亞納尼亞。一憑據曰。掃祿在彼祈禱。仇魔欲陷人於網羅之中。亦先誘人拋棄祈禱之工。故聖女德肋撒云。我願吾聲。响若霹靂。震驚寰宇。大呼於衆曰。求哉求哉。

今我輩可賴聖心以求。懷倚靠謙遜。恒久之心以求。不倦不懈。恐我輩懈而止求之際。正天主將允我求之時也。聖老楞佐如斯弟益云。祈求能息天主之怒。以赦謙求之罪人。祈求能得諸恩。能勝害靈之仇。能滌罪人之污。使變爲聖人。撒落滿云。吾方求主。主即

賜我以智。達味聖王曰。吾方啟口求主。立即蒙其助佑矣。吾主曾語聖婦彼理日大云。我所賜之恩。恒超過人之所求所望。人之祈求。果能妥善。天主無不即時賜與也。然諸般祈求內。最妥最善。更樂主心者。無可比求愛聖心之聖愛者。故當懇切以求此恩。未有恒求而不得者也。求得此恩之易。可謂其求。即其得也。用耶穌聖心以求。更勿憂其不蒙允准也。

聖女默弟而德。將終之前。曾爲託其代祈者。求一重大之恩。吾主諭曰。吾女。可說與託爾代祈之人。彼所求之恩。當於我聖心中尋覓。必能得之。又勸勉其熱切敬我聖心。在此心中。求其所望之事。如孩提求父。不知別法。惟以孺慕之誠。求其所欲之事而已。

宜行之德。神領聖體。與耶穌密締神交。其樂主聖心。未有

可比者。按聖多瑪斯之論。神領聖體。即是以熱切之情。切望領受吾主。如實領者。然此望此情。晝夜不拘何時。俱可發也。耶穌默示於聖女加大理納瑟納。令知神領聖體。何等悅樂其心。示以金銀二器。曰。金器所盛者。實領聖體也。銀器所盛者。神領聖體也。

熱心短誦。 吁。耶穌。因爾聖心之愛。求賜我愛爾。

第二十九日。論欲得敬愛聖心之熱心。第二法是勤領聖體。欽敬耶穌聖體。正是熱愛耶穌之實行。只須明白如何謂之領聖體。則知再無別法。可比勤領聖體。更能速使人熱愛耶穌聖心也。知識經書云。抱火而不焚者。未之有也。聖伯爾納多解曰。可欽可敬之聖體。至大至聖之火也。聖體乃愛中之愛也。聖婦安日辣曰。人若細想聖體聖事之情。見己蒙主如此奇愛。則雖心冷如水。亦

必化爲感激愛慕之烈焰矣。

是以我輩俱當勤詣萬善之源泉。在彼處與聖寵之源。吾主耶穌合而爲一。將見聖寵之流涓涓不竭。日日常新。而傾注於我身也。將見我輩之私欲日漸消弱。不久盡除也。前者向惡之偏情。不久變爲好善慕德之情也。蓋吾主聖心乃德善之聖所。而於聖體密蹟中示我以諸德之表也。此時目雖不見。而實懷存天上之大寶。已得所許於善領聖體者。永遠真福之據也。因凡已得耶穌者。則成聖救靈之寵佑。無所不得也。故善領聖體之靈魂。皆能效聖女瑪達肋納巴西之言曰。諸事完畢矣。蓋此天糧。包函萬美。將一切聖寵神恩。及一切善德。皆置於人靈之內。善人得此大恩。心滿意足。更別無可望者矣。嗟呼。我不求勤領聖體。失去多多聖寵。誠可

惜也。聖教初興之時。信衆每日領聖體。何等信德。何等熱愛。令人難以言傳。而我等如此冷淡疎忽於聖體。亦知如何傷耶穌之聖心乎。一日吾主。語聖女瑪爾加理大云。我在聖體密蹟之中。渴望人來敬我愛我。而幾無一人來解我渴。以愛還愛也。聽主此言。亦可悲矣。

我輩豈可效此無情之輩乎。則宜各自勉力。妥當預備。以得常赴此聖筵可也。此乃補償吾主聖心之辱。而得其歡心之妙法也。若我輩已得常領聖體。則又爲何不善用。此成德救靈之奇方。爲何領過多次聖體。還是一樣之人。還是怠惰冷淡之人。無一毫剛強志氣。以克我等之毛病乎。豈非因去領聖體時。心尙全纏於世物。重視財帛榮名。及世俗之快樂乎。豈非因緊閉心門。不納其聖愛。

之光照乎。豈非耶穌推心置腹相待。我却推之於心門之外。拒而不納乎。蓋吾主曾曰。惟伊懷子。于懷伊者。斯能結佳實而得益也。是以我輩。於耶穌現在心內之時。當滿心堅信切望。自投於主足下。懇切向主曰。主不降福於我。決不容主去也。不賜聖寵。以克勝我難改之毛病。不賜我真切之望德。無厭之愛情。不賜我爲愛爾。勇受苦勞之心。不賜我時時事事。恒行爾之聖意。我即長跪不起也。我心旣爲爾之聖殿。爾不陳設此心。以稱爾尊。乃損爾之光榮也。爾旣以爾賜我。更有何恩。不肯賜我乎。如此懇求。未有不得所求者也。

宜行之德。盡己所能。妥當預備。望得勤領聖體。且當謹記。此大事之效。全係於領前之預備。領後之感謝。聖女德肋撒曾云。

領聖體。而不多得聖寵之故。由於不善用。吾主現在我心之時刻也。吾主方入我心。我即轉背他向。馳意於分心之雜念。何能得益哉。熱心短誦。噫。我何時得赴主前。何時得主降居我心耶。聖詠

第三十日。論欲得敬愛聖心之熱心。第三法是朝拜聖體。

至聖之聖體。不但有益於領聖體之人。若朝拜耶穌於聖體之中。仰之思之。心神向往供奉聖體之處。皆能大得其神效。此乃許多大聖。所常行者。聖理額畧。更爲特出者焉。如此欽崇朝拜。最樂吾主之聖心。蓋其可欽崇之聖心。在聖體聖事內。如不竭之泉。晝夜流溢。惟求注於人心。洗滌而灌漑之。吾主親自招請衆人。汲取活命之水。今在聖殿中。亦如當年。大瞻禮日。如德義人齊集之時。耶穌大聲呼喚群衆曰。凡渴者。皆來就我。暢飲可也。

然徧觀各聖堂之寂寞。可知此時之信友。亦如當時如德義之人。不聽耶穌之呼喚也。然耶穌深望其簡選之人。善聽其聲。以補衆人之無情。因吾主於人欽崇朝拜之際。恒多賜以恩寵。而恩寵之中。更樂施者。即其聖愛之恩也。世人交友。愈多來往會晤。促膝談心。則交情愈厚。愛主之人。若能如此。愛主亦必更切。凡爾信友。朝拜聖體時。與吾主談論。當如孩提之與父母。貞婦之與良人也。有時陳述爾靈魂之病苦。曰。爾所愛者病矣。有時謝其恩寵。曰。吾靈讚主。我之一切內外諸有。俱讚主之聖名。有時頌其美善。曰。義辣。厄爾之天主。何其善也。有時稱揚其聖愛。曰。吁。吾主聖心。爲我被傷。爲我疲憊。我將何言以謝也。有時自卑自抑。曰。我雖塵埃糞土。敢敬與主言談。或以神心。入於聖體櫃中。作爾安居之處。如聖婦

瑪大肋納。伏俯耶穌足下。以淚濯其聖足。以口親其聖手。或同可  
愛宗徒。倒憇於主懷。與主結定誓約。除聖心之外。今世後世。永不  
覓他處居住也。

往拜聖體。不可推辭無暇。不能多去。汝爲談論無益之事。時常失  
却許多工夫。今爲拜望耶穌。反不得幾分之空閒乎。倘能每日。只  
用五分工夫。與吾主在聖體密蹟內。談論交遊。亦可大悅主心。而  
滿其切望也。噫。恐爾所居之處。本係與主同宅。欲往叩拜。不過舉  
步之勞。而汝尙不肯受此微勞。畧顯爾知恩報本之情。豈非異事。  
况吾主常以殊恩。報爾微勞。不令爾無益空回也。有修士曾曰。過  
友人之門。且近爲比隣。竟不入與一言。豈禮耶哉。

宜行之德。若爾所居之處。供有聖體。當定志。不令一日空

過必數次朝拜吾主於聖體密蹟之內。若離供聖體處稍遠亦當每日至少一次進堂朝拜。朝拜時當以格外恭敬耶穌聖心爲先以補冷落慢待耶穌者及阻擋傳播恭敬聖心者之過犯。

熱心短誦。吁。我之耶穌。我之天主。我朝拜爾於聖體聖事之內。

第三十一日。論欲得敬愛耶穌聖心。第四法是熱心恭敬聖母無玷聖心。

童貞聖母瑪利亞。乃全美愛德之聖母也。欲求熾熱己心者。須赴聖母前求之。耶穌聖母二聖心。極其相似。極其相連。最能互相引我。以迭愛二聖心也。所有之分別。不過是耶穌聖心。更寵愛潔淨之靈。而聖母聖心。則更憐憫有罪之靈。以其轉求所得之恩。多用

以洗滌污穢之靈。使能入於耶穌聖心之內。因聖母乃罪人之託。憂苦之慰。普世急難者之救濟也。凡不愛此慈母者。難望入居耶穌聖心之中也。

聖女日爾都德。一日熱切虔誦申爾福。誦至聊亦迴目。憐視我衆。聖母忽現。懷抱嬰兒耶穌。指耶穌之目而言曰。此即憐視爾衆之目也。凡求我者。我能隨意轉我聖子之目。使憐視之也。故我等若存虔切之情。以愛聖母。不久便可熏炙我等之心。同歸於熱。以愛其聖子耶穌。此即聖母。酌報敬己者。最大之恩賞也。再者。投奔仁慈聖母。亦非難事。因聖母說過自己。常先迎接求見之人。而現於其前也。然則吾人愛而事之。實係聖母先自引我等。令至其前。得其所存天主之聖寵。以富吾靈。蓋耶穌聖心。欲施之恩。皆須經過

聖母之手故也。

吾人投奔聖母。更當投奔其聖心。因其聖心。乃耶穌聖心之肖像。刻不相離。時時均分耶穌聖心之志意。分其樂。分其勞。分其痛苦。分其愛我之愛也。欲尋覓耶穌者。離聖母不可得。尋覓聖母者。離耶穌亦不可得。經云。入室見孩。偕瑪利亞厥母。即此言之徵也。祈求聖母。尤當因其無原罪之始胎求之。此乃聖母最悅心之殊寵。用此名以求恩於聖母。未有不得者。我等熱心恭敬耶穌聖心。總勿離聖母聖心。將一切諸有。盡獻於可愛之二聖心。藉耶穌之聖心。以求天主聖父。藉聖母之聖心。以求吾主耶穌。如此。則因聖母而全得所求於耶穌者。因耶穌而全得所求於天主聖父者也。吁。瑪利亞。聖寵之母。求爾憐視我等於此涕泣之谷。視我所受之

患難憂愁。轉求爾聖子耶穌。開其聖心。將我之憂苦。皆納於其聖心而化之。

宜行之德。凡與彌撒。當將聖母在十字架旁之心情。獻於吾主聖心。凡領聖體。亦當將耶穌降孕時。聖母所存之心意。及其權忻之聖樂。獻於吾主聖心。此乃耶穌親示於聖女瑪爾加理大之式。必能大悅主心。且與彌撒。領聖體。乃神修重大之條。遵行之際。所犯一切冷淡懈怠之過。俱可以此法。補救其缺。

熱心短誦。吁。瑪利亞。與耶穌聖心。同心同聖。求賜愛耶穌之愛。以熱我心。

第三十二日。論欲得熱切敬愛耶穌聖心。第五法是熱切恭敬大聖若瑟。聖史若望。與聖類思公撒各。

夫在天之聖。最願以己特著之德。及曾助己救靈成聖之妙法。轉求天主。賜於敬己之人。此無可疑者也。前已說過歷來聖人。無不熱切敬愛耶穌聖心者。今特指明數位。在世敬愛耶穌聖心。知之更明。行之更切。如今在天。以其轉達。更易使我等。得敬愛耶穌聖心之恩者。第一乃大聖若瑟也。聖人蒙天主異寵。曾得抱持奉事耶穌三十年之久。與耶穌同起同居。隱晦於納匝肋。緘默祈禱。以度生命。除聖母之外。實爲耶穌第一寵愛之大聖。而得深知其聖心。所蘊藏之妙者也。爾欲認識敬愛耶穌聖心。可往求於大聖若瑟。因耶穌既愛彼。奉爲鞠養之父。必將心中之奇恩異寶。皆付於彼。任其施於熱心敬彼者也。

大聖若瑟之後。又有耶穌愛徒聖史若望。此聖宗徒。於晚餐之際。

倒憇主懷。默契聖心。首先得其中之秘情。吾主懸於十字架時。衆徒皆散。獨聖人隨聖母。親見耶穌死後。聖心被刺。血水併流。記錄於冊。以證其實。是又首先入居耶穌聖心。傷孔者也。爾欲得熱愛耶穌聖心。不向此聖求之。更向何人求之乎。

更有聖類思公撒各。時時習練內修之工。與天主不離。而熱切敬愛聖心。更乃其格外之印號。想其在生時。時刻刻。不斷以聖愛之箭。禱。直射耶穌聖心。今在天國。凡其嚮時。一切愛主之火箭。皆回射其心。使之永享愛情之樂。然其在天。所以升於崇高之位者。因其在世。曾熱愛耶穌聖心。度謙晦內修之生命也。噫。誰知內修之功。如此可重耶。以外顯之事功比之。遠不相及矣。

凡爾專務內修者。聖類斯乃爾等之善表也。爾少年之輩。聖類斯

乃爾格外之主保也。彼實格外懷念爾輩。再者。彼曾顯示於人。切願敬愛耶穌聖心之善功。廣傳於衆。爾若託彼轉達。以求此恩。必然極樂其心。肯爲轉求。滿爾所望也。

宜行之德。倣效聖類思公撒各之遺表。時時勤念熱心短誦。因再無別法。可比此法。能使人前進於耶穌之聖愛者。此等短誦。猶如火箭。直達耶穌聖心。且可補一切神功內之缺失者也。

熱心短誦。吁。耶穌聖心。誰能使我獨愛爾耶。

第三十三日。論耶穌聖心。極願人熱切傳播敬愛聖心之善工。人雖自己熱心敬禮耶穌聖心。猶爲不足。必須竭力傳播此善工。爾若果有愛主之心。則此事並不難行。因熱切之德。乃愛德的真憑據。故聖奧斯定曰。無熱切者。必無愛也。

然用何法。以徧展爾之熱切乎。人人皆能之法有三。一是善表。爾當勉力。先立熱心敬愛耶穌聖心之表。此乃最簡便。最效驗之講勸也。二是善言勸人。奉行此功。使不知者。皆知敬禮聖心。已知已行者。使之保存。加增其熱切。第三。更妥更易之法。即是懇求耶穌聖心。施恩默照。感動變化衆心。使皆得識之愛之。因敬愛耶穌聖心之熱心。似屬耶穌最珍貴之恩。必欲親手付於人心者。此等懇求之法。最爲容易。無人可推爲難能。歷來諸聖。凡熱切光榮天主。救人靈魂者。皆知祈禱之能力。最動天主之心。是以口中講勸。猶爲不足。而必加以祈禱之功。蓋皆有悟於聖保祿宗徒之言曰。栽培者力無幾何。澆灌者功不足誇。使之苗秀結實者。惟天主之力也。

相傳耶穌會中一鐸德。每將講道。必先用三點鐘工夫。熱心痛哭祈禱。然後升座。更有一服役之會友。以管門爲職。而勸化多人。或問其何法得致此效。答曰。我未向人說一句話。先向天主說百句矣。我輩果能如此而行。必得所欲之效。故當勉力恒求。曾有盛德人間。主曰。爲何世道如此敗壞。主不特生大聖。以振興變化之耶。主曰。因世人祈求不足故也。

凡人求爲成某善事。求爲救人靈魂。欲得所求之效。最善之法。是仗耶穌聖心以求。此乃天主親訓之法。童貞女名瑪利亞者。自述曰。一夜我爲救人靈魂之事。有所求於天主聖父。心中自覺。此番不像素常。容易得我所求。我遂俯伏於父足下。深自謙卑。痛哭。求其賜我知道。如何方能悅其聖心。允我所求。乃聞有聲曰。用我可

愛聖子之心以求。我方允爾所求也。從此以後。我每日俱以此法收結我一日之工課。每日亦得格外之殊恩焉。

聖瑪爾加理大云。我曾見多人之名。印於耶穌聖心之內。且永不磨滅。因彼等皆曾切願他人。愛慕恭敬耶穌聖心故也。然當知道我等之熱切。該有明智相幫。方可有益。瑪爾加理大曰。天主之事與世俗事。大不相同。辦世俗事。若欲其成。必須多作多爲。辦天主之事則不然。惟當隨天主之默照。讓天主聖寵先行。我等竭力謹隨於後。不可越而過之也。所以勸人敬愛耶穌聖心。當以愛德之溫和。徐徐誘引。使此熱心。入於天主所選之心內可也。

宜行之德。倘若爾有貼己之錢。當用一分。爲買講論聖心之小書。或聖心聖牌。分散於四外。以廣其傳。試看惡人。或異教人。

常有錢財。刷印傷風敗俗之書。以散於衆。我輩於聖事。反不能如彼耶。

熱心短誦。吁。耶穌聖心。願爾恒受光榮讚頌。至於無窮之世。

總結

聖經內有言曰。吾羊隨意出入。得水草肥茂之場以牧焉。在此聖月中。爾既定過善志。若欲寔踐於行。最妙之法。不外乎三者。即是入於耶穌聖心。出自耶穌聖心。復返於耶穌聖心也。一。以靜默祈禱。入居於主聖心。與之連合。二。爲勤行本分。或作善工。而出主心。又無非爲主始出焉。爾之出也。當如天神之出天堂。而仍不離乎天堂也。雖因忙迫。不能隨意返入主心。亦當有得便即返之切望。常自存於天主無所不在之中。常以耶穌相隨。爲得方便機會。傳

之於同居共事人之心。中。使共敬之可也。三。復返於主心。即是屢次舉心。仰望於耶穌聖心。作工之際。每一點鐘。或一次。或數次。舉心向主曰。耶穌聖心。爾乃我之力量。我之喜樂。我之真福也。如此生活。則是我輩在耶穌內生活。耶穌在我輩中生活。自能不犯大罪。臨終之際。有能不蒙耶穌憐憫者乎。我輩勉之哉。

## 耶穌聖心聖月

終

24

343003